

筆記小說大觀

集

薈

清

蕞

俞樾纂

編

第五冊

進步書局校印



仁者，人也。親其大也。故大德必得其親。義者，宜也。尊其大也。故大德必得其尊。禮者，節也。節其大也。故大德必得其節。智者，知也。知其大也。故大德必得其知。此四者，大德之四行也。仁者，人也。親其大也。故大德必得其親。義者，宜也。尊其大也。故大德必得其尊。禮者，節也。節其大也。故大德必得其節。智者，知也。知其大也。故大德必得其知。此四者，大德之四行也。

會叢編卷十五

清 曲園居士纂

周夫人

前明周忠武公遇吉之忠勇世多知之。乃其妻亦奇女子也。世則未有知者。山東李織齋煥章有周夫人傳。今錄於此。云周夫人者山西總兵左都督忠烈公周遇吉元配也。將家子。貌美麗姣好。纖小盈盈。有異力。善騎射。挽弓數百石。讀兵家言。傳李衛公兵法。屢佐忠烈公立奇功。崇禎末。從忠烈公竄武帥幕中。李自成西入潼關。據西安。稱大順王。僭號永昌。夫人謂忠烈公曰。明年寇必渡河。將軍當奏之朝。統兵禦之河上。天下事猶可為也。忠烈公是之。不果行。明年正月。寇分四將軍。兵出河懷蒲津。自分兵四十萬。由西安東收諸塞上兵。趨宣府居庸。犯京師。是時忠烈公在雁門。聞諸鎮路將皆降。乃擇標兵三千人屯甯武。寇至。忠烈公迎之。戰三大敗之。俘斬數千計。自成驅榆林甯夏兵共攻忠烈公。又大敗之。追戰陷重圍中。奮力格鬪。俘斬愈多。日暮寇已退。馬中流矢。忽蹶。忠烈公拔佩刀自殺。夫人貫重鎧持雙矛。三陷陣。入中堅。折其牙旗。斬最驍將。寇大崩壞。莫敢當。自成至日暮。又合圍。夫人潰圍出。標下健

兒盡矣。夫人怒，自鞚聞提其賊前隊將而舞，寇披靡，自成大驚，遁去。陣潰亂，夫人乘亂攻之，所擊殺近萬。忽聞傳云：忠烈公已就斃，夫人大呼曰：「天乎！天乎！將軍死，戰何為耶？」亦自殺。時有一將軍最勇，亦死軍中。史氏並軼之。余來趙城，學博文水武公。君子不妄語人也。為予言其本末，為之傳。附忠烈公傳後。見李煥章文集

曲園居士曰：按明史周遇吉傳，夫人劉氏素勇健，率婦女數十人，據山巔公廨，登屋而射，每一矢斃一賊，賊不敢逼，縱火焚之，闔家盡死。是公之夫人為劉氏，其勇健誠有之。如此傳，則并能持矛陷陣，力戰捐軀，凜然烈丈夫矣。錄之，亦可補史傳之遺。周遇吉諡忠武，此云忠烈，何歟。

### 沈雲英

沈雲英，浙江蕭山人，居長巷里中。父至緒，崇禎辛未武進士，為道州守備。雲英性聰慧，工書，旁涉經史。癸未，張獻忠破武昌，入湖南，湖南郡縣皆靡，惟道州以至緒力戰得全。既而再與戰，馬驚仆，隕於陣。雲英聞父變，奮呼持矛趨賊壘，奪父屍還。賊環糊之，雲英左右支格，賊莫能傷。完守入保，而道州終不可破。湖撫王聚奎疏聞，烈帝詔贈至緒昭武將軍，而授雲英游擊將軍，仍代父為守備。守道州。雲英所適，四川人賈

萬策為荊州督師營中軍。分守南門。城陷。不屈死。雲英聞夫變。慟哭辭職去。閒關數千里。出入賊壘。扶柩歸蕭山。遂隱居。教授里中。兼以書法訓後學。族子兆陽。受春秋胡傳。為知名士。卒年三十八。觀汪啓文集

畢著

歙縣畢氏女。名著。字韜文。亦國初人。布衣王聖開之妻也。年二十。隨父宦薊邱。父與流賊戰死。屍為賊所得。著身率精銳劫賊營。手刃其渠。眾潰。與父屍還葬金陵之龍潭。夫婦偕隱以終。有紀事詩云。吾父矢報國。戰死於薊邱。父馬為賊乘。父屍為賊收。父讐不能報。有媿秦女休。乘賊不及防。夜進千貔貅。殺賊血漉漉。手握仇人頭。賊眾自相殺。屍橫滿坑溝。父屍輿櫬歸。薄葬荒山陬。相期智勇士。慨然賊同仇。蛾賊一掃盡。國家固金甌。又有村居詩云。席門閒傍水之涯。夫婿安貧不在家。明日斷炊何暇問。且攜鴉嘴種梅花。見國朝閩秀正始集

曲園居士曰。畢著事。與沈雲英相類。故並錄之。正始集中。又載許夫人。奉天鐵嶺人。鎮平將軍一等男徐都治。謚襄毅公之妻也。精韜鈴。善騎射。偕襄毅公出兵。每自結一隊。相為犄角。康熙十三年。吳三桂犯湖南。襄毅往援彝陵。夫人駐防江口。

十五年鎮將楊來嘉叛夫人脫簪珥犒師沿江勦殺屢卻之八月倖犯鎮署夫人中礮歿將軍蔡毓榮等以聞特旨優卹予雲騎尉世職以次子永年襲何國初奇女子之多也朝廷一例哀榮以命婦而從陣亡恩例賞延於世亦非常曠典也而其時之師武臣力即可於斯徵之矣。

### 王秀女

烈女王氏名秀女開封浚儀人王碧少女也年十七許字于之瑞子天祥未幾天祥死父母匿不以聞將期密議改適烈女始知之匍匐奔喪父母不能止遂與偕往是日為天祥小祥烈女出向所受聘陳之靈几躄踊絕粒者二日父母促之歸烈女願留事舅姑之瑞令妻與女伺其臥起踰年瑞女適人姑獨與烈女居烈女聞天祥幼育於陽武王姓己為娶妻生子輟妻死遺孤就哺外戚烈女思自撫之為于氏宗祧計王堅不與烈女益失望適天祥大祥烈女哭祭不食終日姑倦寢烈女夜起自經是夕有大星隕於家黑白二氣自屋角出久之乃滅警夜者怪之及曉烈女死顏色皎然如生初之瑞有刈麥刀二其一忽失去至是從烈女枕下得之益信其死志非

一日矣

見毛際可安序堂文鈔

廖氏

廖氏者河南開封府某縣人。流寓東南。嫁沈大誼。美容儀。工挾彈走馬。及鞞韞蹴鞠。高維諸技。所至人遮道觀。嘗至烏程道上。羣少年方逐射。顧見紙鳶。一人出錦織成。約曰。即中。與若錦。不中。罰如直。於是少年皆不中。廖氏行而前曰。妾請為君彈之一。發而得。載其錦以去。後十年。移家嘉興。值歲大旱。村人多絕食。廖氏為給一月糜。賴以全者數家。亡何。大誼死。慨然曰。吾少之所為。長而悔焉。所為浮沉者。壻非此。不活也。今壻死。甯復為辱人賤行哉。遂著比邱服。邀其鄰一老嫗。俱入阜亭山。結茅屋。惡衣糲食。焚香誦佛。見者不能狎也。山有猛虎。常殺人。過其門。率馴擾而去。山中人益異之。見李良年秋麟山房集

李孝貞

李孝貞名鳳。秀州李夢康女也。事父終身不嫁。夢康士而貧。多不再炊。女織絁以佐戶贖。吟誦與杼聲相聞也。父疾。禱於天。有烏銜果。蘇墮藥中。嘗而進之。脫然愈。里中世族爭束帛僂皮。徵孝貞。孝貞益不自安。一日。請於父曰。女孰賢。佯曰。善事舅姑耳。女曰。休矣。焉有舍我父事他人親。以為賢乎。竟不可奪。閨巷聞而化之。諸婦女有

爭言語相恐嚇。戒勿令孝貞知。時復為之語曰。生女慎勿嗔。養父不嫁有孝貞。孝貞何私謚也。先父死年四十七。見丁澎文集。

### 林氏雙烈

林氏在太平為望族。孝廉君楚惟之長子有茂。娶同邑崔氏女。甫二載而茂卒。崔以娠故未殉。子生而殤。崔於是仰天長歎曰。吾所以忍死待者。為未亡人植遺腹耳。今已矣。吾何求哉。盡出其奩中資以奉姑。以分妯娌。給奴婢。初取鉛粉咽之。弗死。吞金簪。又弗死。俟家人防稍懈。投綬而死。孝廉君有女。字石球。方生未歸。聞方生病篤。女減食。輟膏沐。若欲與同生死者。比卒。家人匿其訃音。女疑之。宛轉詰侍兒。乃得實。即哀請佳奠。弗許。哭三晝夜。不絕聲。水漿不入口。孝廉不得已。與期曰。奠畢即返。依舅姑。不若依父母。便女唯唯。於是輿送方生墓所。哭奠如禮。歸拜舅姑畢。乃引鏡自刺其面。涅守志。二遣輿迎。不肯返。曰。凶服在身。不敢侍父母側。迨明年。翁復殤。姑李氏自刎以殉。人意此時女必死。女泣曰。兩叔幼。伯舅姑老。我死誰為翁姑強者。於是凡附棺之具。纖悉治具。無不至。越十日。命侍女具湯以沐。湯至。給侍者出。而雉經於寢矣。任繩隗為作太平雙烈傳。見任繩隗直木齋集。



張氏五烈

甯晉張來鳳兄弟。以詩書世其家者也。戊寅冬。閩賊陷甯。來鳳之母李。率其妻劉。暨弟起鳳妻霍。附鳳妻章。從弟嘉猷妻王。死之。初賊薄城下。勢且殆。諸婦謀諸母。母曰。吾輩婦子。有死無二。相與亡匿文廟中。見古井泓然。指而歎曰。吾一家得死所矣。我先之。若等從而後。諸婦請曰。婦輩年盡少。不死即存。姑老矣。其何為。母曰。雖然。終不潔。囊裳而趨。諸婦挽之力。咸跪請曰。姑老矣。不死終無憂。母熟視良久。賊洶洶迫牆外。給曰。然若志自行之。我當反。諸婦泣且拜。以次挾穉子投井中。母仰天呼曰。吾豈真舍兒輩生邪。躍而入。有婢名秋湄。救不及。亦死之。越日賊去。來鳳兄弟出。諸婦及母。屍如生。劉及章猶抱一子。未棄也。道旁觀者歎泣。命其井為第一泉。謝令鼎新。易名曰五香。顧令予成。又改稱五烈。勒石以紀其事。見程可則海日堂集。

女奴景

澤州陳文貞公。有記女奴景事一篇云。女奴景。贅夫柴乙。皆從予京師。乙病。景輿以歸。及家而乙死。既瘞。景時節哭瘞所。虎銜豕來。熟視景。景哭極哀。不見虎。樵人遙見呼景。景近虎尺許。虎卒不傷也。其家諸柴。數逼景嫁。不從。朝夕虐酷之。居二年。人或

益不堪。謂當以告吾家。景曰：吾居主家久，主不預外人事。吾柴氏人，豈以吾事累主邪？諸柴愈困，環伺將奪之。景乘夜再訴之縣，道遇虎當路，景趨過虎旁，虎臥如故。景抵邑門，坐守至天明，門開，趨縣庭號訴。縣令哀其情，召諸柴，數而答之。後令行案境中，景遞道訴，又數而答之，愈窘虐愈慘，乃念乙死時，言主家遇我厚，我死終不能報主人恩，甚恨之。景於是提攜其九歲女，六歲男，泣涕匍匐，乞食野宿，走京師，行五閱月而達，計程二千里，中多峻山大水，水潦秋方盛，深及腰腹以上。景凡涉水，則先負一兒抵岸，再返負其一兒，日數涉，涉幾死者數矣。蓋其艱如此。至之日，家人以告，予詢之，言歷歷感其事，不禁泣下。女奴微者耳，名義所不貴，而能卓然自立，使人感動如此，豈非出於至性者歟。

見陳廷敬  
午亭集

### 濮氏女

沈昭子有桐鄉濮氏女，傳曰：余姨母朱適於濮，其家財萬金，無子，姨悍，夫不敢畜媵妾，止一女，計以萬金遺女，為擇婿。吳生，吳生貧，置利田宅予之，給奴婢什物，夫妻美衣食，媵佚遊，如富人居。女獨自念母，以女故，斬濮氏祀，義不忍，從容白母，阿母即百歲後，安能饗異氏一杯羹，且令濮氏世世宗祠不血食乎？母怒罵曰：吾用萬金餉汝，

犬豕猶知人意。况人乎。女於是不敢復言。一日。父過其家。女私語父曰。母之心。父所知也。女為父置箕帚婢。父時至。令侍巾櫛。生男。存濮氏祀。女死瞑目矣。父喜過望。感且泣。與女約。生男而長。萬金共女中分。女笑不答。歲餘。生果男也。女度不可隱。載而之母家。會濮氏一二長老。廟見男。具白母。母有子矣。為母賀。母見之大驚。疾怒。次骨。不可忍。然已不可奈何。行復自念。女逆我如此。何用逆女為。不若長養此兒。誓不予女一錢。是固女命絕之時也。於是收其田宅。奴婢什物。驅就他舍。勿復相見。吳生日窘窮愁苦。鄰里親戚。故所與遊者。皆誚笑之。生憤恚。婦欲刃之。婦度無所容。遂自經以死。見沈珩狀  
巖文選

### 蔡氏

蔡氏。閩漳浦之舊鎮女也。為里人張延祚妻。少有大志。膂力過男子。而延祚亦以勇聞。稱義士云。王師旣下閩。濱海數百里。猶多負固。有方祐者。大舉兵。兵經延祚里。延祚與語不合。被殺。氏哀號。日夜不絕。謀於夫之昆弟。欲盡散家財。購死士。為夫報讐。諸昆弟曰。是豈兒女子所能邪。出聲。吾族赤矣。氏不敢復言。撫十數歲孤兒。晝則相抱哭泣。夜磨刀霍霍。仰天踊起。誓必殺祐。一日。聞祐兵宿某地。距其鄉甚近。日夕。怕

首袴靴衣短後衣藏利刃。突至祐壘。未及數十步。反顧見其子踉蹌來。愕甚。執之耳。語曰。若安得至此。曰。思母耳。氏頓足自念曰。兒幼不可舉事。且吾以死決。兒脫有不測。張氏斬矣。遂挈之歸。一軍無知者。踰月。祐悔禍投誠。自束縛詣郡縣。郡縣官憐而釋之。俾復比編戶。已而娶於蔡。為氏王母女弟。氏因得常常見祐。每見益恚。髮豎。晷反裂。然不令祐覺也。祐且為甘語市之。氏亦曰。死者不可復生。方君舉兵時。肝腦塗地。甯獨夫也。君縱勿相慰。余忘之久矣。祐意大安。氏則益憤勵。齧指出血。每當更闌。漏下。人聲寂然。轉展牀第。或起立開門。左右顧。旋入仰臥。泣聲嗚嗚。握利刃刺壁。壁既穿。刀刺猶不已。如是以為常。踰年為戊子春。氏偵祐往從父家。大喜。陰挈其孤止某地之松林。度祐必經此。氏椎髻偏髻。挾刀以俟。日午。祐果至。雄服怒馬。顧盼自如。氏突出林中。大聲叱祐。祐驚遽召其從者。從者駭走。氏急持刀斫祐墜馬。祐負創狂奔。氏疾追之。行人麇至。環而譁。氏厲聲曰。吾夫為此賊所害。妾安可活。有助賊者。吾與俱死。爾。讐雪。妾當就死於官。且言且馳。祐攀松枝與鬪。中氏額血被面。鬪愈銳。淚血相迸淋漓。往來衝突。鷲若飛鳥。俄而祐被擒。氏以左手把其髮。右手奮刀。堪其胸。旋斷其首。擲道旁。觀者瞋目。橋舌不能下。氏又揚言於眾曰。吾夫為賊所害。歲餘日。

猶未瞑。必思飲其血。復提其頭。竟奔延祚墓。置頭墓石上。泣告所以殺祐狀。把酒澆墓。凡三行。拜畢。攜幼子。直赴巡按御史臺門。請死。御史霍達異之。欲縱之去。然疑有主者。氏慟哭曰。所以不即死者。為三尺孤耳。今孤且勿顧。容受他人指使邪。幸勿以妾故亂國法。霍默然良久。卒縱之。見陳玉璣  
松峰集

### 董嫗

董氏者。江都韓文適先生家嫗也。嫗給事韓久。有恩。當乙酉城破時。先生與夫人蕭氏及其長子將就死。夫人痛韓氏之絕也。抱三歲兒哭拜嫗。嫗泣受。裹諸懷。即夜遁。當是時。萬馬屠城。城中火起。照鋒刃如雪。天大雨淙淙。與戈甲聲。亂殺人塞坊市。嫗匍匐蛇行。刀頭馬脚之下。伏死人中。祝兒曰。天不絕韓氏。勿啼。兒果屏息懷中。從城竄出。匿江灘。拾麥穗啖兒。得不死。亂定。投韓之故人高氏。義育之。及長。有成。名懿。字醉白。醉白將婚。嫗病甚。熟視新婦。泣曰。妾子病且死。不及見爾夫婦之好矣。善事爾夫。爾夫昔抱持從萬死中活。有今日。其為人賢且才。雖貧勿憂。後必大。毋效世俗兒女子易爾夫也。婦敬謝之。嫗即沒。年八十有三。見汪懋麟百  
尺桐梧閣集

### 項淑美

項烈婦諱淑美。高安東錦溪里人。適茶坡方希文。希文好學。烈婦獨總家政。年三十。未有子。為希文置一妾。未幾。烈婦生子瑞合。人謂賢婦之報云。丙戌春。潰師駐高安。沿江數百里。皆屯兵戍守。所在縱掠。希文攜家避諫村。烈婦念田畝遠廢。無以自給。會親族姨姒皆居西坑山谷險峻。去家近。得以兼綜諸務。遂徙依焉。希文雅好古。圖書萬軸。悉載以往。五月四日。妾子病疹。希文攜瑞合。延醫百家坪。烈婦與一姬一婢俱。是夕兵驟至。因風縱火。火將及。婢泣挽烈婦衣。欲俱出。烈婦正色曰。出則死於兵。不出死於火。等死耳。死火者不辱。若能死。從我。不能。亟去。時嫗已先逸。見火熾甚。復奔入呼曰。火封舍矣。又呼曰。某某已出。匿他所矣。皆不應。積書左右坐其中。火焚書。燼烈婦死。見方象瑛健松齋集。

馬烈婦

馬烈婦閩氏。青州安邱人。適同邑馬元成。元成遭瘵疾。烈婦晝夜視藥餌。見其夫痰悶。喉中喀喀作聲。輒豫以手承之。疾可歲餘。咳唾未嘗至地。迨元成病革。損及食飲。烈婦如之。已而日僅進一粥。烈婦如之。屬纊之前。絕水漿者六日。烈婦亦如之。元成竟死。烈婦形神慘淡。有求死之志。家人知之。防閑甚密。欲呼鄰媪伴寢。婦曰。東家小

姑可與共話。何必攪老人夜眠邪。其意以少女易寢。俟其睡。可自裁也。姑覺。竟以老嫗伴之。又更八日。其姑偶出。為姻家送葬。烈婦取粟。令其弟礮之作糜。復給其勇。覓菜市中。反闕向嫗於別室。乃繞出孝堂後。由北扉入。躡棺而上。先以繩自結其頸。後繫棟間。足甫離棺。烈婦死矣。烈婦年十五。歸元成。二十七喪夫。後其夫十二日死。時康熙二十五年三月六日。見張貞文集

張有

張氏者。高唐朱母劉孺人侍兒也。名有。鄒平農家子。其父以歲祲乏食。鬻之孺人。時女才十歲。性柔順。孺人絕愛憐之。及長。欲為議婚。女聞色變。詢之。掩淚以對曰。妾幼曾許字某氏。今改適。是渝前盟也。死不敢從。孺人嘉其節。亟覓廉壻付之。及得其人。已有妻。子女纍纍矣。以語女。女曰。渠雖別娶。亦須相從。不願更事他人也。婿以兩室。非貧家所宜。終不肯。女守義彌堅。孺人益重之。撫若己女。服食居處。不令與僮輩侷。年三十。以疾卒。康熙壬申三月二十一日也。見張貞集

王孝女

王孝女。慈溪王孜之女也。居城之東偏。歲丁巳七月十八日夜二鼓。失火。孝女母卒。

停柩於中堂。孝女處樓上。趨至中堂。疾呼昇柩。無應者。已而火至。孝女伏棺上。不肯去。其父從火光中遙見之。抱之而出。則已死。灌以礬水。稍甦。聲出喉間。僅絲髮。問母棺出否。家人不答。遂哽咽氣絕。時年十五也。先是四月之盡。城中菊花盛開。觀者絡繹。不知其為何祥也。至是而有孝女之事。古來火逼親棺。守死不去者。東漢之蔡順。古。初晉之何琦。齊之傅炎。梁之徐普濟。元之余丙。祝公榮。郭通。陳汝楫。明之楊敬。祝大昌。節翰。陳倫。然皆幸而得免。其不免者。則宋賈恩。隋李孝子。明唐治始。三人。然皆男子。以弱女而殉身者。僅一孝女而已。見黃宗義南雷文約

阮貞孝

貞孝姓阮氏。鳳陽天長人。諸生阮振聲女。許字王博士璠之子道聲。未嫁而道聲死。阮氏年十五。告於父母。服喪。服。驅車詣王之門。登堂拜夫。不哭。拜舅姑。遂留守夫喪。誓不復嫁。其初父母未許。舅姑亦辭。已而知志不可奪。遂從之。既力行婦道。侍姑費氏疾。至於刲股。姑卒。喪之如禮。始歸甯。舅再娶林氏。阮曰。吾可歸家矣。歸事林如費林。復遭危疾。阮衣不解帶。每夕禱於天。願以身代。林病良已。於是即縣以阮氏貞孝之行。白於巡方御史。上之朝。以待旌。見歸莊恒軒集



嚴烈婦

洞庭東山有嚴烈婦陳氏。于歸未幾而嚴生夭。乳哺孤兒不三載亦不育。於是日夜冀其翁之葬。嚴生凡七年而後葬。烈婦負奩資悉傾於夫之病與喪。女紅自給。未葬即檢諸為人刺繡奩飾者歸之。自製附身服物。皆極整辦。葬之日。往奠於墓。哭盡哀。歸而於其夜自經死。見味用純  
愧誠集

黃氏

黃氏應山明經黃思閔之女也。少學書。畧通古史。受涂氏長男聘。年十七而涂氏子病且篤。女請命於父。往訣。因袖刀至涂宅。竟日而涂氏死。遂欲自刺。思閔故無子。泣下謂女曰。禮女未嫁則從父。汝父况無子。汝為夫死。如汝父何。女乃止。周身素衣。從容經理。纖悉必謹。然後歸。再請父命。以其妹許涂氏次子。期年父死。遺貲可千金。女三分之。以其一治父後事。葬祭皆成禮。其餘分半與妹。而以其半予族弟。立為父後。條理井然。區畫無遺。告家眾曰。某乃今從涂氏子於地下矣。於是擇期歸於涂。初。思閔存時。客有為女改嫁地者。言未畢。女即於室中舉刀截指。數指俱斷。客驚走出。故人皆知女志不可奪。至是莫有屈阻者。屆期。族黨皆具素冠。以喪禮相送。女拜別。更

拜父墳。哭盡哀去。觀者填路。無不泣下。至涂宅。不食七日。死死之前一日。應山令聞而奇之。亟詣余宅。入室求一見。是時女奄奄垂絕。猶引被覆面。不見邑令。邑令僅見其手。無左指。兀然一掌。歎息良久。為之泣下。涂氏厚殮之。與其長男同穴而封。應山令為勒石紀其事。見嚴首昇嶺園詩文集

羅氏

羅氏華容。嚴循閑之妻也。循閑性通敏。喜飾儀容。好學廣交。善滑稽。開口而笑。無虛日。羅氏年十八。歸循閑。貌寢而拙。期年生一女。無何。為循閑所棄。不入其室者十餘年。羅氏獨與其女共晨夕。拮据米鹽。不啻未亡人。然事舅姑彌謹。奉中饋無闕。每客至。循閑未嘗入謀。而杯盤應時具。雖黽敏同心者。容未逮也。於是循閑母及祖母及伯仲母。咸責詈循閑。為羅氏不平。久之。循閑病。羅氏就侍床側。煮藥進糜。夙夜不稍懈者二百餘日。循閑病漸不可起。羅氏私自泣。目盡腫。抱其女屬姑曰。脫有不諱。當以身殉。願姑視此女如子。勿但以為孫也。比循閑死。羅氏哭盡哀。兩手掬地。十指冰裂。爪甲殆盡。姑令婢子輩防守。是夜漏盡。同守者倦。縊於棺側。同穴而封。里中人為歌。穀則異室死。則同穴之章。以誅之。頃之。其女亦死。循閑竟無後。見嚴首昇嶺園詩文集

秀水張氏雙節

秀水諸生張三錫妻許氏。儒家女也。孝而賢。常刲股療姑疾。居數歲。無子。媵高氏。有二子。雋發。雋升。乙酉。三錫攜室避兵相家蕩。盜劫其貲。縛三錫。沈諸河。許氏將殉之。高氏止之曰。二子在。未可以死也。許氏挾二子與俱。竄而免。亂既定。偵得盜。攜二子哭訴。兵備使者佟公國器收盜抵法。人咸稱許氏之智也。許氏復為二子拮据。皆授室。凡十四年。而許氏歿。高氏教二子有成。雋發有名。諸生間。雋升治生以養母。益擴其先業。又十餘年。高氏年已五十餘。人咸稱二氏之苦節。一死一生。皆不愧亡者於地下。列狀上有司。學使者李公廷柱采之表其閭。見彭孫始文集。

常孝女

孝女姓常氏。毘陵農家之弱息也。幼失恃。依其父以長。年十二。父病且死。撫其女曰。吾不及覩汝成人矣。奈何。女悲。父言。誓不嫁。募地半畝。負土成墳。窆其父。即墓側營草廬。焚修其中。墓地為不肖弟鬻之者三。而孝女三贖之。歲大饑。盜入其室。被劫幾死。卒守父墓。不為動。壽六十餘。郡人孫文介公慎行。特造其廬。敬謁之。斬然哀經。蓋終身如一日也。又恐歲月漸遠。一坏蕪沒。乃度女弟子二人。嗣守之。里人哀其志而

欽其行。就草廬為祠宇。名貞孝庵。在郡東二里許。毘陵薛少公先生為之碑。載其與人決休咎如響。人稱常孝女。亦曰仙女。此明萬曆間事。見張光緒息廬齋稿。

### 王去華

烈婦字去華。金谿名方伯若水王公孫女。嫁諸生陳諤正夫。有才色。年二十二。隨母避亂咸塘。正夫時病足。謁醫客路。會兵數萬。自石門噪縣西諸村落。殺老弱七算。將近咸塘。初正夫大父蒼梧令元亭先生。生平癖書畫。多秘珍者。盡以予諤。諤尤愛蘇文忠書。醉翁亭記真筆。常自襲之。出必藏烈婦所。是日平明。烈婦改服蓬首。棄簪珥衣襟。獨持一手卷。著胸前。與其母倉卒離鄭家源。晡時。兵噪呼自後至。烈婦屣不能前。哭地上。欲遲其父翰卿。及弟惟歲。而翰卿以晚行見殺。不來。母強挾之。稍前行。得一池。烈婦止不動。魔母曰。娘老矣。疾走。毋返顧。告陳郎。求我屍此地。急置卷池旁。一躍入池死。母尋亦死。三日兵盡。翰卿屍先得。或傳言烈婦入軍中矣。當是時。民追贖妻女者。載路。正夫意不樂。直視久之。弟踊且哭曰。若尚不知吾姊乎。吾姊前與母發咸塘。語絕痛。誓必死者。但南求。無北索。我保姊不妄言。遂共行。到池上。亡有。眾皆曰。死三日半。而肉不浮乎。惟歲不聽。使人澆其水。則烈婦在焉。出之泥。若一折藕。浴而

歟。肌顏玉雪。惟十指甲盡脫。血凝碧。時兵所過。女子無佳惡。馱以副馬。或連繩縛去。踣溪水。衣帶漂水面。輒長戟鉤取。無完者。烈婦脫不自奮入泥中。入泥中不力者。幾不得死。正夫及是慟絕。喪之加於禮一等。見傳古衡湘帆堂集

### 王節婦

節婦詹氏。年十七。且笄而字。其婿王朝寤。儒生也。抱羸疾。不克親迎。節婦欲往省。而難其家人。朝寤母命輿舁至。勉合卺焉。亡何。朝寤卒。距其合卺三旬有七日耳。此三旬七日中。罔非辛勞悲悵之夙夜。而無所謂燕爾靜好之晷刻也。股以糜羹。涕淚以和湯藥。而朝寤竟不起。無已。剪縷髮納殯。號呼而矢曰。予其殉也。顧無子而莫為之喪。三年之喪畢。不相從於地下者。有如此髮。聞者皆哽咽泣下。自是勤女工。時慰解其姑。嘗歸甯。母勸之易慮。輒以死拒。久之。服且除。而勿除也。或疑其緩死。緩死者。憚死也。憚死而志或移乎。一日。悉檢衣飾以還母。而次第滌其常服。詰朝寢不起。姑及諸如排闥入。則衣盡紉結。擁被宛轉。若創痛不可忍。而息微屬曰。死若是難。枕側梳有餘。視之。鹽澆也。嘗屑豆為腐。故私貯啜之。遂絕。時丙子四月之十二日。朝寤之死。以癸酉正月。至是。凡週歲者三。而又逾三月。服闋而勿除。非緩死也。推其意。以

三年之喪為三週而又三月禫也。初不諳禮制之為廿有七月耳。抑賢者以過期為

厚邪。

見吳肅公  
街南集

### 傅節婦

節婦吳氏年十七適黃池傅生光箕。時傅生抱病矣。踰年傅生死。父母以年少諷之。旋因歸甯。留婦而責贍於傅。且訟之。頻噪逼節婦。節婦託鄰姆潛舟往傅。傅以訟故怒弗內。節婦大窘。欲自沈。嫌野死無以自明。隱忍掩泣而返。請自食。無以朝夕累父母。因力為紡事。車聲軋軋。霜月炎字。飲淚悽魂而已。顧媒姆恆窺其戶。向父母刺刺不休。節婦覺輒覓死數數也。於是更僦舍以居。崇禎時歲頻歉。扃戶而餓。鄰餽之弗受。族姊魏母亦廢也。遺之米。乃半易糠覈。或怪之。問故。曰。雜糜之可一月不死也。久之積紡資。買女雖十歲許。拾糶供爨事。日購腐屑。女雖對咽之。率以為常。女雖者曰春蘭。先是有自鬻偶之者。不耐餒。尋去。春蘭亦善自衛。里媪或呼春蘭食。節婦必審所自。戒毋輕受食。春蘭自是即不受里媪食。今年四十餘。無他。

見吳肅公  
街南集

### 宋烈婦

吳門宋實穎母葉氏。以名族歸子堅先生。嫺於內則。為子婦。為妻。為母。皆有法度。乙

酉閏六月。薙髮令下。太湖中有起者。城內外火。光燭天。實穎與父謀出避兵。夫人正色曰。出走者。汝輩事爾。吾婦人去將安之。昔伯姬不避火。春秋美之。火且不得避。況兵乎。於是實穎奉父出。而夫人閉戶坐達曙。俄聞有兵持刀觸門者。門未啟。夫人遽同李子實方。女雪娥。實穎婦朱氏。牽袂奮身赴井死。仲子實栗。號泣井旁曰。母死。兒何心獨生。亦赴井死。兵既去。實穎負母及實栗屍從井中出。顏色如生。而實方與妹及實穎婦俱植立井中。竟日不死。見魏禧叔子集

### 謝烈婦

謝烈婦。甯都諸生葉芊妻。性好潔而弛緩。時避兵某村。天大暑。將浴。兵驟至。亟揮手指芊。負幼兒。間道逸去。謝為部將所掠。悅其色。將妻焉。詢其家世及夫。謝應對惟謹。因斂手致辭曰。今日從將軍無疑。然須澡浴畢。惟命。部將大喜。聽之。久之不出。趨室中視。則引鬚刀自剄死矣。部將大感動。歎曰。此真烈婦也。特植木表屍旁。大書其夫家世姓名。趣令收葬。三日後兵退。色如生。衣私澤無一亂者。芊藁葬之於西郊淨樂僧舍後。易堂諸子。並為詩傳。誄而祭之。易堂魏禧妻。與烈婦從兄弟也。禧之詩曰。婦既烈。火義如從水。人智也。生婦智也。死蓋人之節烈。固亦有非智不能成者。謝氏死

如是。可無愧禧言矣。

見彭士望耻躬堂集。

曲園居士曰。此傳所謂易堂諸子者。詳見魏叔子集翠微峰記。曰翠微峯。距甯都城四十里。邑人彭氏於山之中。斫辟平地。作屋其後。諸子講易。蓋所謂易堂者也。子同伯兄季弟。大資其修鑿費。遠近之賢附焉。即此所謂易堂諸子矣。

### 海烈婦

烈婦海氏。徐州人也。其夫曰陳有量。家貧甚。而海氏有姪。為江陰卒伍。訛傳姪得志。乃夫婦過江投之。及至。姪亦貧甚。勉贈二金以別。是時江南漕兌。方集常州。運軍皆徐淮諸衛。海氏夫婦欲歸徐。而不能自達。居常州逆旅。莫覓親識。附艘歸。久之未得。而所贈二金者。稍稍費盡。旅食錢無所出。旅主楊二。見海氏有艾姿。以為奇貨。可居會運軍伍。長林顯瑞。饒資好淫。酒中輒肆大言。則楊二因而囚之。顯瑞窺見海氏。則心益迷。乃相與設謀。勾其夫入艘。非惟附行。且得直也。海氏覺耳目有異。不肯從而楊二。故逼索旅錢以劫之。顯瑞若得為同舟。而代償者。以要之。其夫故孱人。無聊。又為二人所持。乃強海氏登林艘。海氏不得已。居稍艙。堅閉艙門。顯瑞欲一窺而不可得。使艙工婦誘之。不聽。顯瑞失望。尤楊二。楊二曰。既在君艘。君為政。何怯也。於是為



必得之計。使其夫往蘇州買簞索去。因借酬神名。聯三艘演劇。冀以盡海氏。海氏不  
視。然而顯瑞已視氏為凡上肉矣。海氏自夫去。度不免。密聯其上下裏衣。針縫無隙。及  
顯瑞中夜破門入。強海氏。海氏悉力拒之。且罵且泣。乘間縊死。時康熙二年正月二  
十六日也。顯瑞急呼人解屍。雞已鳴矣。遂與弟林四謀。匿屍米中。而欲追殺其夫以  
滅口。水手藍廷九不平。乃給請追夫。而赴司理密首。司理朱公。立委經歷繆公檢驗。  
林顯瑞、楊二皆伏其辜。海氏小殯於娘娘廟側。吊者如市。今立廟。與龍興寺對。香火  
頗盛。見任源詳  
鳴鶴堂集。

曲園居士曰。海烈婦之烈。非藍廷九則或淹沒不著矣。藍廷九亦義烈之士也。錢  
唐馮山公解春集。有義士藍九廷序。今附錄於此云。丙子冬日。予行清和坊。避雪  
宗人藥室。有壯士。睥目豐頤。長不滿八尺。而腰大九圍。敝衣穿空。望見予。眴然欲  
前致辭。予奇其狀貌。揖以入。宗人舉手獻觀曰。公無然。此齊人也。壯士慚據而退。  
時雪霽。予乃踳街而走。追及壯士而問之。對曰。身姓藍。名九廷。山東人。少為糧船  
篙師。南北居貨貿易。致千金。散予窮親。故立盡。隨子臺灣。今夏乘海船北歸。至四  
明。遭風覆溺。身攀木。緣崖得生。歸而無資。以是行乞於杭市。得三金。可抵家矣。予

憐而止之宿。贖錢告同志。事立辦。九廷大感。明日將行。予夕飲之酒。酒酣。九廷拊膺太息曰。身亦曾讀書。了了明大義。少時卻萌。為烈婦申冤。人稱義士。今不幸遭患難。飢餓瀕死。竊自念天道苟可知。決不填溝壑。異鄉果遇公。獲濟。予因問烈婦為誰。曰徐州海烈婦者是也。康熙六年。烈婦堅拒旗軍林九功。夜穴艙強好。自縊死節。方是時。身卻九功。嗚官。官來出屍米中。玉色如生。相衣窮袴。皆牢綴如裹革。言未既。予離席鞠肫酌九廷三大觴。亦自觴曰。馮景何幸見義士。吾故知君非常人。果然。且君非遭海風覆舟。予奚由見君。君亦奚由至吾前。述三十年已事。予將奮筆表君。使百世下知有篙師藍九廷者。義士則天道果可知也。九廷喜甚。罷酒就寢。雞初鳴起。篝火磨墨。索予書。書已。天亦明。九廷再拜予去。按此序。與任息齋先生所載海烈婦事。微有異同。海烈婦傳。稱事在康熙二年正月十六日。而此序則云康熙六年。或藍九廷所述。偶誤二為六邪。傳云。運軍林顯瑞。而此云林九功。殆運軍亦有名有字。顯瑞其名。而九功其字邪。至傳云。藍廷九。而此云藍九廷。則當以此序為正。此乃藍所自述。不容訛也。至周青士采山堂集。亦有海烈婦傳。但云藍九。則更為不審矣。

蒼葢編卷十六

清 曲園居士纂

秦甯三烈

秦甯縣諸生庾愈達。妻李氏。好讀書。通詩書大義。愈達嘗學制舉業。寒暑每旦至夜。分不少輟。李氏辟蠶以待。然嘗有不豫之色。愈達怪而問之。數不應。久之。目愈達曰。君尚無子。子與科名孰重。愈達憮然。於是勸愈達納汪氏女為妾。數年。又無子。更為娶張氏。而愈達益事制舉業。不樂家居。築別業於隔河石壁下。李氏每女紅閒。則持女孝經及女小學。正席南向坐。二妾東西向。為講章句大義。旁古今貞淫善惡感應事。二妾遞當日。供菜果餌以為常。愈達一日自別業歸。聞講書聲。駐戶外竊聽。李氏則教二妾識仁字。語諄復不休。已。愈達入而笑。李氏正色曰。志士仁人。有殺身以成仁。毋求生以害仁。丙戌。愈達挈家避亂石韜之新塘坑。於窩室得國變錄一冊。愈達取閱之。瘧作。中止。李氏乃晝夜讀至竟。明日。呼二妾告曰。予昨夜讀國變錄。甲申三月十八日。簡討汪偉知京城不守。誓死為厲鬼殺賊。夫人耿氏曰。妾則請從。十九日。聞城破。耿夫人執榼承飲。請偉共酌畢。五拜起。偉縊於右。夫人縊於左。夫人既引頸。

就帛。忽顧偉曰：雖顛沛，不可失夫婦之序。乃皆出帛，易左右位，縊以死。李氏語至是，哽咽不能出聲，淚落如雨。二妾亦相持悲號。主人婦疑愈達妻妾失歡，競來慰藉。卒不知為何事。九月初三日，敵兵逼新塘，愈達攜妻妾同鄉人夜走南石砦。砦素號天險，四壁牆立，遠近搢紳富人處其中。明晨，敵兵前後攻砦門甚急，礮聲震天地。砦中人欲竄從他去，愈達亦率妻妾至砦口，則萬人奔擠，不得下。李氏顧愈達曰：君何必出砦門出。砦門者，吾三人事耳。愈達曰：汝輩顧得出，未及答。羣呼兵自後門入，李氏即從砦口，展两手投崖下。愈達既已無可奈何，更攜二妾奔別崖。巖中巖多棘刺，男婦數十人先伏處，未幾搜牢兵至。愈達遽瘧發仆地，而張氏投巖死矣。愈達出金進兵，兵得金去。汪氏牢把愈達衣，伏其後，頃之，遙見一朱纓窄袖者，拔刀南向立。諸小卒執槍挺東向侍，指揮巡邏山前後，矚猶無人狀。汪氏乃大哭曰：君善自保，登身投崖石。石石擊，搏於巖左。若支解然，是夜雨甚，兵宿崖頂。明晨兵退，諸鄉人婦與愈達同伏巖中者，皆得免。見魏禧叔子集。

秦節婦

秦節婦劉氏，年十七，繼室文學君甲祐。六年而君疾瘵，又踰年而卒。前子四符，方九

歲子四採。一歲節母艱難以教二子者三十年。而後乃以壽終。嘗訓二子曰：年荒，衆人之荒也。學荒，則吾兒之荒也。兵亂，衆人之亂也。心亂，則吾一家之亂也。魏禧曰：嗚呼！可以傳矣。魏禧叔子集

### 梁烈婦

烈婦張氏，清苑梁公以禮妻也。公以進士授太康令。明年調商邱，時賊犯開封，所至糜爛。公語烈婦曰：吾為天子命吏，誓必滅賊，與城存亡。烈婦曰：諾。目公佩刀，各奮衣而起。壬午，賊李自成合袁賊羅賊衆數十萬攻商邱，公乘城拒守。既夕，曹而進，拜辭其父中議公主，與烈婦訣曰：城且陷，倘陷，我必死，知汝亦必死。左右皆掩面泣。烈婦指所居樓示公曰：尸我於是。命老僕楊材積薪環其樓，且告曰：若城朝以陷，則火朝以舉。夕以陷，則夕以舉。毋遲我死。公胄而出，呼守陴者發礮石，頗擊傷賊。賊稍卻。烈婦傾橐裝市牛酒以資軍賞。垂五日，賊攻益急，仰射人，人頗死。鼓音四面不止，相驚以賊至。夜過半，一城傳呼曰：賊入。公嬰城以戰，賊刃公仆地。烈婦聞之，驅婦媵登樓曰：吾夫死矣，若等從我死，毋苟活。遂衣平日白衣，縵於梁，將自縊。呼楊材舉火，材哭不忍發。烈婦厲聲叱曰：汝忘爾主訣別時而背之乎？賊至，等死少延，使我不速死。汝

罪莫贖矣。材伏哭。叩頭舉火。烈婦死。三十餘人從死。一子燮。方九歲。隨烈婦登樓。火熾。哀號焰中。老嫗急掖之曰。主人惟此郎。幸得脫歸。以後梁氏從樓上推墮兒。僕五政負兒逃。是夕。邑民求公亂屍中。救之。越三日。甦而烈婦則死矣。商邱人立烈婦祠。春秋祀之。昏夜嘗見白衣人轟樓址間。則烈婦固不死也。見王猷定四照堂集。

### 沈孝女

錢塘沈孝女。父人驤。母周氏。嫁陸有奇。母病。歸侍母。母瀕殆。每云。父老弟少。母何可。以死。兒願代母死。樂於生矣。母曰。益危。孝女乃伺夜鼓深人悄。潛自割其左臂肉。血濡縷。不肯止。猶忍之煎湯進母。母吸之盡。問母好否。曰好。乃退。仆著甕。不能起。呼聲慘慘。父入。但曰。兒死矣。死矣。竟不言其故。其父見血大流。溢驚而抱之。久之。竟殞。及將殮。浴見創。而始知其以是亡。蓋使人知。用藥裹止血。亦可生。而必不言。世傳人知。割股事。則疾者無效爾。於是母病乃旋。以甦。身代之志。竟符。奇孝格天。信哉。見毛先舒思古

集

### 唐烈婦

烈婦曹氏。海甯唐之坦妻也。夫病。婦奉湯藥。半歲不鮮。衣病益亟。志殉以死。預治殮。

具。每物必以副。為夫繪象。己亦繪象。家人固怪之。夫且死。母勸之食。曰。夫絕粒矣。我何忍獨食。夫食乃食耳。比夫死。將服砒毒以殉。妯娌見而奪之。稍聞。更噉灰水。腹痛終夕。不死。復取三錢吞之。母意奪其一。而兩錢已下咽。又不即死。乃哭以殮。殮畢歸。寢。潛以酒置牀下。中夜服之。碎其杯。家人覺而不及救。有頃。大呼。臟腑如欲裂者。再。忽大吐。竟不死。砒灰水錢酒四物。皆能殺人。要非可探手即得。婦悉蓄儲以待。以此知欲殉其夫。非一日也。既盡服四物。不死。乃大慟。曰。天乎。天乎。死固若是難乎。毒固不殺人乎。雖然。吾必死。吾且以水死。舅姑與母更勸說之。萬方。度不可奪。則戒之曰。與其水死。甯絕食死。遂復絕食。二十二日。而猶不死。乃夜啟牖。自投於河。鄰婦救出之。氣絕復甦。水汨汨循腸下。所吞錢隨而出。眾更強之食。乃曰。諸大人能強我食。不能禁我死。無何。夢其夫迎與俱去。曰。百日為期。夫死之日。丙辰九月二十八日也。遂以十二月望。拜訣舅姑。復絕食。家人見其然。且敬且憐之。既已無可奈何。則曰。婦要當死。無久困婦為也。於是不復勸。又十五日。為歲除。內外空惚。忽失婦所在。行視柩側。麻衣纍然。懸幌在梁。烈婦死矣。現潘采遂初堂集

蔡烈婦

蔡烈婦孫氏。福州侯官人。父諸孫穀。有高操。與同里蔡其聰相好也。烈婦有姊。嫁其聰次子以仕。而烈婦歸少子以位。家酷貧。以位棄其業。與醜商同事。至順昌。遇羣行販私醜者。呵止之。起而格鬪。以位被創死。婦聞悲慟。勺水不入口者數日。潛自縊以救解。迎喪江干。奮身投水。有持之者。不克死。其姨以義責之曰。若幸有子。即死如立孤何。乃不復求死。官捕得私販者。法當抵死。而律令須檢傷。乃定罪。檢傷者。洗肉見骨。慘不忍言。婦曰。是重傷吾天也。痛不欲檢。而非檢則冤不伸。理官悲其意。為杖斃首惡二人。婦感理官刺骨。每夜焚香祝天。然如恨銜。終身未嘗露齒。足不踰戶閭。同產兄舉子。迎之暫歸。終不往。有疾。不肯服藥。其姊慰勸之。萬方終不解。語次嘗以孤屬其姊。喪且再期。謂其姊曰。吾兒幸稍長。襪履可取諸市。不煩手縫矣。兒向苦瘡。今愈矣。不累吾姊矣。有言既祥。而姑在。當具淺色綦履者。婦曰。無庸。姑緩之。姨察其有異。陰守護之。大祥之日。顧從容如平時。哭奠畢。就寢稍休。久之不出。姊趨視之。則闔戶引經自經矣。時康熙乙亥七月十三日也。年三十有九。

見潘耒遂初堂集

### 郭烈婦

郭烈婦林氏。閩縣人。嫁為郭繼汾妻。繼汾聰穎。善讀書。工楷法。然嗜飲。喜遨遊。得病



嘔血猶弗改。婦數數苦諫，謂宜節飲擇交，繼汾怒寢，不見答。婦弗怨也。脫簪珥為湯藥費，斷髮誓天。夫病篤，屬兄嫂善事大人，毋以我為念。夫歿，撫屍慟哭，即日投井死。

後蔡烈婦一日耳。年二十四。

現潘未遂  
初堂集

### 卜氏

卜氏，周孝廉妻。孝廉名宗彝，字五重，別號青蘿，海甯硤川里人。崇禎己卯，舉北闈。甲申之變，宗彝絕粒數日。卜氏強勸之食，曰：「君亡國破死，固其宜。然竊聞江左尚有推戴事，未可知也。」蓋俟之。宗彝復蹶然興，盡傾其家貲，募勇敢，練鄉兵。水陸設重關，複柵以捍衛井里。未幾，南都不守，大兵且下浙。宗彝與弟啟琦同蹈兵而死。卜氏號而召妾張氏、王氏曰：「吾固知有今日，但張也生男，尚在孩抱，孰能為周孝廉作程嬰乎？」二妾相顧曰：「死易，立孤難也。」卜氏遂束其子明珠於懷，躍池水中。二妾從焉。乳母輩赴水死者十餘人。越數日，從姪明俱具棺殮。卜氏及二妾猶屹立不仆，面皆如生。里人遂名其池為節義青蘿池。

見許汝霖  
德星堂集

### 郭孝婦

孝婦，開封郭鍾琇妻。而王指揮堯臣女也。明崇禎間，李自成兩攻開封，不克。總兵陳

永福子射其一目眇。大恨。於十五年四月。率眾毀四郊麥。百計攻城。城中乏食。推官苗澍。括民粟三次。麩一斤。直銀二十兩。纏絡草。小紅蟲。瓦松。螻螂。每勦至三緡。人相食。孝婦家計口。日熟麩水一盃。繼以糠藪。庭前蒲萄。啗其葉。盡。姑年七十餘。不能食。孝婦懷有乳嬰。乃以漣哺姑。如是數月。嫺日減。嬰餓損。呱呱泣。孝婦撫之。亦泣。接頭也。猶強笑語。上堂乳其姑。九月十九日。賊灌黃河水入城。家眾號。巢木上。乳絕。漣涓滴。僅奉姑。嬰竟瘦。已而水益漲。伴高福。得一小杓。鍾琇扶母上。命孝婦面雍樹。長兒圻隨。而身與弟別出。浮漂巨浪中。隨波瀾。竟蓬湊。四顧皆賊壘。無所之。有絳衣老父。須髯蟠垂。曳杖來曰。爾郭氏妻孥邪。焉知路。可隨吾行。抵河干。不見一賊。引入草舍。甚潔。曰。此有粥食之。又曰。吾引爾渡河相聚。命登一舟。姑勞坐。而氣絕。孝婦擗胸泣曰。天乎。吾願貸年活姑。以乳哺姑口。夜半甦曰。渴欲沸水。孝婦曰。此舟中也。安得沸水。仍以乳哺之。翌日。抵河北岸。絳衣老父已先候。無何。遙指鍾琇曰。爾家主至矣。遂不見。

見李塔  
恕谷集。

魏烈婦

烈婦王氏。新城王五公先生之孫女。年十五六。父曙光。許歸魏氏。事舅。韞石。姑田氏。

盡婦道。夫克儉，病弱相之，敬而順。康熙三十二年，克儉補易州諸生，嘗讀書保定府城內，時病旋劇，烈婦聞之，自易州倉皇入侍，左右奉養，卒不起。烈婦擗踊長號曰：「吾無天矣，可生邪？」吞毒，半下咽，姑見以指出之，大哭呼曰：「吾與汝舅俱有年，汝夫之二弟推汝夫死，汝又死，是死吾夫婦也。」灌以藥，日夜令人防，且曰：「若叔後日產子，首即與汝。」烈婦時年十九矣，乃強理生計，茹荼攻蓼不少懈。數年後，季子克肅生，子繼先，遂以嗣之。烈婦撫育甚摯，髮鬣督就外傳，隨兩叔父學，夜歸必令背誦。初，克儉藁葬坎下村側，至康熙四十八年，韞石立新阡營葬，烈婦同穴之志，怛然動，淚集裳，不可拭，已而佯為歡笑。時韞石率二子入府試，烈婦撫繼先曰：「汝祖及叔父出，祖母室無人，兒可伴祖母寢，繼先牽裾不去也。」及夜，視兒寢熟，乃釃漱櫛緹，以手畫壁曰：「吾事畢矣，志遂矣。」端坐几上，雖經而卒。見李恭恕谷集。

王氏姑婦節烈

王烈婦，登州衛訓導周天顧女，性貞敏，通孝經，列女傳，有殊色。適王永命，崇禎五年，毛文龍之變，將耿仲明等據登州叛，縱兵淫掠，將汚周，周大罵，賊將逼辱之，周乃紿曰：「我不從，有親喪耳。」今設祭釋服，當更妝從，賊信之，已而閉戶自縊死，賊怒，支解之。

當叛兵之逼烈婦也。永命匿不敢出。烈婦給賊去。倉皇出。持烈婦泣。烈婦曰。我死耳。君欲攫賊刃。而使我為賊。汙乎。走也。胡泣為。乃逸。事平。結少年偵賊所在。斬其首。以祭烈婦。鼎革後。從入關中。順治丙戌。進士。仕至大同知府。子業昌。康熙癸卯。科舉人。濬縣知縣。娶彭氏。名德貞。德貞喜讀書。明大義。其先江西廬陵人。祖士宏。為南宮知縣。闖賊陷南宮。士宏將死之。顧謂家人曰。奈汝曹何。德貞方八歲。應聲曰。國而忘家。翁反訓也。庸再計乎。士宏瞿然曰。孺子言是。遂死之。業昌卒。彭方二十四歲。矢志不再。適力學讀書。著有毛詩義疏。詔旌其門。子二。曰爵。曰鴻。女子子一。曰玠。皆負異才。彭自訓之。鴻不仕。工詩歌。刺劍。精伎擊書數。所交多奇材俠士。爵為人負氣。好謔罵。玠嘗作短劍行。諷之曰。西風激射。劍鳴中夜。周君子身。柄不輕借。百練之器。折則弗迴。苟非大故。納箭勿開。母見之曰。女顧出。兄上邪。家亦貧。母安之。二子介然自守。不稍屈。今家通州。人呼王節婦家云。見王源居業堂集。

曲園居士曰。周天顧。即周忠武之兄。而王永命者。其祖王好智。與忠武同死甯武關。即所謂王鐵鞭者也。世稱忠臣義士。往往無後。王鐵鞭之後。奇才異操。不已多乎。

徐烈婦

烈婦朱氏。永康侯徐錫允夫人。年十七寡。無子。錫允庶伯應垣襲其爵。夫人屏鉛華。坐臥一樓讀書。學書法。善彈琴。每月夜闔庭戶。焚香獨奏。尚調激楚。聞者悲之。事姑孝謹。姑憐之。時與同臥起。甲申三月十九日。都城破。家人聞難。驚避去。保姆曰。夫人避。夫人笑曰。我何避。保姆曰。夫人即死。如太夫人何。太夫人曰。吾婦且不避。吾何避。皆不避。於是夫人奉廟主。至中堂。積薪於庭。再拜太夫人曰。請與姑侍廟主。同以火。太夫人曰諾。乃取命服。漬油服之。太夫人西嚮坐。夫人東嚮侍。命舉火。火舉。太夫人倉皇欲避。不得出。繞屋而號。夫人堅立不動。頃之。逮乎火而死。夫人侍婢四。皆聰慧。教之習書彈琴。愛之甚。夫人將火。揮之去曰。若毋火。四人泣曰。夫人死。婢子焉避死。請皆火。火發。烈燄蔽庭戶。忽一婢。若有物挈之出。擲鄰屋瓦上。膚髮皆焦灼。半日甦。方避去。事定。始出見故人。為流涕述其事如此。見王源居業堂集

吳烈女

烈女吳氏。吳人也。少失母。弟妹四人俱幼。烈女撫之甚篤。許字宋氏。未嫁。宋氏子死。欲自盡。願弟妹無所依。弗忍。乃請往成服。父色然駭。叱曰。若室女也。胡為此辱矣。若

翁更為若擇嘉耦。爾女痛哭累日。夜欲赴井。家人持之。吞金約指。宋所聘也。將死。父憐之。且悔。急藥之。得不死。慰之曰。兒毋死。我成兒志。特不得往成服耳。我養若終其身。不亦可乎。女領之。乃復食。女故慧。嫻事。父母孝。長讀書。識大義。至是。吳下競傳之。閭里莫不稱歎。而其父乃更納他氏聘。親迎有日矣。女聞之。太息泣下。乘父他出。侍兒寢。乃繫帛於梁。置二金鳳釵於几。皆宋聘也。手書繫衣帶。請以釵易棺。歸屍宋氏。遂自縊死。宋氏聞之。大驚痛悼。再請其喪。與宋氏子合葬。吳下士爭為詩文以誄之。時丁丑四月也。見王源居業堂集

張烈婦

婁縣烈婦張氏者。農家女。嫁魯氏。夫家故非良。姑與夫。迫使為私。以為利。婦志不從。姑大怒。箠撻之。凍餒莫之恤。凡三四載。志終不變。閒語所親。涕泣以死自誓。既而其夫劫之他往。婦知不免。夜啟戶。躍入萬安橋水中死。越八日。里人獲其屍。色如生。時丁丑三月。年方二十一歲云。見王源居業堂集

閩中三烈婦

三烈婦。其一為陳東生妻李氏。雍正乙巳。東生弟大生卒。東生傷之。其明年春。東生

復卒。李氏誓死相從。既成服。即自經。其姒急救之。甦。委曲解勸。佯為聽從。越旬餘。忽梳洗靚妝。盛飾以出。姒怪而問之。則曰。哀極無聊。將出游。以寫我憂。姒信其語。弗之防也。既而入戶。自以羅帕經臥榻中。蓋越夫卒甫十五日云。其一。為岐江林氏女。適遼沙唐氏子。唐為巨族。而氏夫業操舟。往來江湖間。歲一歸家。處數日。其母輒託氏盡其夫。丙午冬。唐氏子病瘵卒。林氏解髻結夫髮。擁屍臥。至日中不起。姑呼使起。氏大聲曰。此纍者屍也。即竟日寢。庸何傷。既而延唐族諸明經列座序者。語之曰。為我備兩棺。余越三日。將從夫死。是日天陰無雨。利於觀者。諸族人咸勸諭。堅勿聽。則為之市新衣一襲以進。且白其事於官。至期。結高臺。具鼓吹。氏服新衣。登臺四拜。南向立。母家夫族次第行奠。氏笑容可掬。立而受之。至其父奠。則答拜如禮。奠畢。撤饌。取五穀。扱社拋四方。祝曰。令吾鄉時和年豐。毋為厲也。轉身。即次就鏡臺。解髮。取一銀簪。縮所懸繩。復取兩珥。呼其嗣子與之曰。以是作留念。遂手挽其繩。稍短。呼父攜杙。掖之升。解所佩帕。纏繩。引頸以入。即伸手長逝。姑急登臺撫屍。踊且泣曰。甚矣。吾之不知人也。曩者誤語若。若無恫老嫗。是日天陰。無雲雨。臺下觀者數千人。皆噴噴稱奇。共牒令請旌。令以格於例。不許。其一。為方氏女。許配林氏子。家素貧。賣餅於市。

別僦屋以婚。結禱之次夕。延客未散。卒中不起。林有義父語女曰。新婦甫一夕耳。奈何。女泣曰。吾自有處。死吾分也。居停主人知女志不可奪。即謬為大言曰。吾貸若屋。不利死人。一之為甚。其可再乎。女不應。即趨市。就餅肆自經死。時雍正丙午歲之十二月。見方遊集。

李貞烈

李貞烈。江南太倉人。父李蘊石。夫黃繼姚。未嫁。夫卒。奉舅以待嗣。嗣立。舅終。還以死殉。原其始。貞女也。要其終。烈婦也。彼君子易名。美必重書。倣其義。核其文。駢貞烈。不目女婦。庶乎其可。貞烈自髻。齟別席。性岸然異。不苟言動。無巾幘態。兄浩。以才氣冠其儕輩。當女弟。猶憚之。年十一。江夏黃永思為子委禽焉。十九。瀕行矣。而黃氏子卒。康熙丁酉孟秋也。貞烈辭父母。赴哭。殞絕。既視殮。拒戶自經。舅解其懸。慰之曰。吾失子得汝。吾子視汝。不女視汝。吾禰子失母。吾使母視汝。不嫂視汝。他日。次子有子。則汝後也。貞烈俯不應。舅令二女謹伺之。重陽日。貞烈夕奠畢。乘間復自經。舅又覺而免之。父兄聞。馳至。責曰。汝何舍難而苟為易也。汝不當代夫子事君舅乎。代君姑畜諸穉乎。待孤子生而育之。教之。以續死者乎。貞烈蹶然起曰。敬諾。麾二姑去。吾不敢



死無相守為矣。無何。二姑相繼嫁。季旦初亦娶婦。雍正乙巳。季生男。舅名之曰仲康。命貞烈子之。貞烈喜且悲。告於繼妯之靈而誓之。引刀斷一指。寘奠筵曰。所不盡心力以鞠此子。所不酬吾初志者。有如指。指先往矣。兄者大驚。聚哭失聲。庚戌舅歿。貞烈曰。吾其可從夫子侍親地下。躍入井。旦初亟統而下。出之。踞博籓。號泣曰。親未葬。嗣未成人。前後事暴廢。非夫人翼之。如隕越何。願且留。貞烈頷之。乾隆丙辰。葬舅姑。以繼妯附其兆。既虞。聘兄浩女。室仲康。即命從浩就業。時仲康生十二年矣。明年寒食。貞女省墓。徘徊松楸間。顧嗣子曰。吾事無餘矣。初姑適某氏者。早寡。有腹田二頃。夫之昆弟裂而攘之。至是歸甯。其嫂愬其事。切齒揮涕。貞烈曰。尊章在乎。曰亡矣。有兒女乎。曰無有也。然則安所用田。曰無田。何以生。曰汝生亦贅也。盍死乎。死易。不死難耳。如不信者。吾為汝先。語訖。從容如平時。薄暮。有見貞烈立梅樹下。久不移。呼之不前。逼視之。纓脰死矣。乾隆丁巳孟夏也。距夫死二十一年。見顧陳塘集

### 徐烈婦

烈婦張氏。居上海黃浦東川沙城堡。其夫徐俊。以病疫死。里中有豪某。素窺烈婦姿。而莫敢以犯也。烈婦夫死。時仲夏。天驕熱。烈婦馮其尸。哭五日。而卒無棺。以斂。豪乘

其急以貨畀之。烈婦勿受。乃鬻其女。以買棺而斂。而烈婦之母悍而貪。有周某為豪計。曰。是可以貨餌也。於是厚以遺其母。其母逼烈婦改適豪。曰。汝改適則汝生。不改則汝死矣。烈婦痛哭曰。吾死可也。而何以改適為。持刀截其髮。瘡其面。血淋漓駭人。周猶唆其母逼之。勢終弗肯已。烈婦遂自縊死。其長女已鬻於人。其乳下女方呱呱然也。見劉巖集。

冬青女

冬青女。和州陳氏女也。初名冬。女性喜冬青樹。冬青者。女貞也。於是請父。名曰冬青女。冬青女年十八。而死於其夫黃氏子之家。黃氏子曰。奠鉉。冬青女笄而未歸。而奠鉉死。冬青女聞之。泣請於父母。欲往焉。而奠鉉之兄曰。元稜者。弗許。將葬。請弗許。弗許已葬。乃堅以請。元稜不得已許之。往一夕。而冬青女以髮纏帛。自勒其頸死焉。元稜則以為穢虐也。急除之以桃荊。而擗尸而歸之。至陳氏門。則烈風自擗中起。飄譽蓋至空中。啟擗。而面色尚如生。陳氏之父母遂棺而斂之。臨吊者數千人。無不下泣者。有司往祭之。越三年。乃得聞於朝。旌黃氏閭。而卒與奠鉉合葬焉。見劉巖集。

王氏女

女王氏。亳州人。襁褓中喪其母。其父許同里李氏子。曰殿機者。為婚。俄而殿機父以犯法死。母沒入旗。給象房校尉為配。殿機方三歲。隨母入象房。後復鬻身於廂紅旗。已。牙嗽厄爾庫為奴。執拾糞役。厄爾庫買蕭氏女配之。殿機與王氏女家絕不相聞者二十餘年矣。初王氏女稍長。而其父死時。執李氏所納替珥而泣曰。此李氏家物也。數年人傳殿機已死。女之叔與兄。迫女使改適。人曰。殿機沒入旗久矣。或云今已死。即不死。當必不得歸。即歸而沒。乃為旗下廝養婦。吾恥之。女泣曰。殿機縱不歸。甯為殿機死而已。幼已許為殿機婦。雖廝養。其何辭。而叔與兄所以奪之。愈益急。女嘗數數欲自求死。既而泣且曰。吾與其今日而遽死也。吾不如匍匐赴京師。得一殿機消息。然後死。鄰有范翁者。年七十餘。故與其父為莫逆交。而女素以父行呼之者。女乃哀乞翁。求挈之。赴京師。抵殿機所。其叔與兄知其意。乃使之升樓。而去其梯。女暮絕樓下。密獻驛車。與翁晨夜走達京師。入象房。而殿機母死已久。問殿機。皆不知。女大號哭。諸校尉大驚。而老校尉知殿機鬻身處。引之至厄爾庫所。呼殿機出。則殿機荷畚自馬棧中出。翁趨而語之。故女以父所遺替珥持示之。則相對大號。泣諸市。行人如蟻而至者。皆流涕觀之。而厄爾庫大義之。亦為之下涕。於是捐直。使殿機挈

蕭氏與女俱歸。巡城御史以聞。時康熙二十八年四月二十九日也。下部議。議允其歸。且令王氏叔與凡以裝奩給之。使無失所。時女已年三十有四云。見劉巖集。

### 金壇三烈女

出金壇郭門南徑三十里。為長蕩湖。濱湖有墓。高四尺。木數拱矣。黝然如銅鐵。而樞榫皆以三相縲。視其肆。亦如之。詢諸長老。長老曰。嘻。此三烈女葬處也。烈女者。王氏其二為同產。其一為諸姊妹。當大兵之初下江南也。曲阿以東賊猖起。而金壇倪文炳為之魁。其掠人也。嘗以書過。晡則攻剽。倪曰。吾不似諸君之似鼠者。當是時。烈女家濱湖。年各十六七。以往。三人相從紡績。已而相從避寇。隨母兄。延緣葦間。日且入。則相率歸其居。旦起復避去。以為常。一日。遣僕渡岸西市小食物。而遇賊方晝掠歸。欲兵之。問誰與。主人翁者。僕怖。道而之葦間。賊掠無所得。而顧有三女子在焉。遽劫縛登筏以去。中流。三女則大呼。泣且詈。而視賊方持己急。因跌蕩不自止。良久。筏傾。三女子死焉。賊數輩亦皆溺。無一脫者。方賊之劫三女子去也。離而行。每一女子。輒兩賊夾之。背反接。牢甚。明日。屍浮水上。縛盡弛。三女子攜手如平生。而髮相縻。類有縉結之者。家人瘞諸湖濱。表以樹。於今甲申。六十年所矣。烈女之歛也。無棺。其家以

故置之級三重者。藉幹而哀拊之。初所遣僕阿寄也。後死於牖下。無他而賊之渠魁倪文炳者。去烈女死一年。遂藏於豐義儲氏。見方榮如集。處齋古文。

### 梅節婦

節婦姓李氏。安順梅運昌妻也。運昌崇禎己卯拔貢。知四川江津縣。氏攜子赴任。而流寇張獻忠構亂。道梗不通。遂抵平越。寄居母家。已而訃至。則運昌死城守矣。氏仰天號泣。業不欲生。而子建方六月。女三歲。念無可依以活者。乃忍死為撫育計。丁亥。流寇蘇孽蔓延黔中。氏毀容勞面。倉皇出走。使老婢負其女。而自抱其子。復挾利刃以防不測。至貴陽城陷。旋奔威清竹亭寨。是時賊騎充斥。大路崎嶇。山徑中攀崖踰澗。艱險倍甚。其間望塵起立。匿身叢菁。以脫湏臾之命者屢矣。及抵竹亭。疾呼寨下曰。吾安順梅宦婦也。急啟闕納我。先是有譚姓者。嘗避亂寨中。以遺索屢挾勢索償。居人苦之。以故聞氏言。輒拒不應。氏計無所出。恐賊至。痛哭欲自刎。有張氏婦見而憐之。語云。若勿云宦家也。當得入。遂割所居舍之糧盡。剪衣製履。使老婢易米而食。未幾寇至。寨人降。日肆搜羅。氏復挾子女潛匿巖洞中。時既逼寇處。而荒山豺虎出沒不時。輾轉遷徙寄生者七十餘日。始得返安順焉。喪亂之餘。家業蕩然。氏甘淡泊。

習勤苦事。屢值兇荒。而家計不匱。子女婚嫁。卒能成禮。安順地雜苗蠻。苗俗好畜蟲蛇之毒。陰以咬人。名曰下蠱。中者無久近必死。又或取人服飾之類。為妖術以詛咒之。終氏之身。子建食飲。不無出己手者。其殘衣敗履。必深藏篋笥中。凡所以保護之者。類如此。然其教之也。則又嚴而有方。午夜篝燈。呼起坐。督誦。無間寒暑。閒則道其祖父遺事。及流離奔竄之狀。以相勸勉。康熙庚申卒。年六十一。方運昌之沒於蜀也。氏年僅二十有五。距其卒。凡三十六年。其間兵火盜賊饑饉。天人家國之變。叢集交困。氏以孱弱幼婦。出入萬死一生中。既能保身全節。而又教育稚子。克有成立。聞者無不難之。見劉青藜高陽山人集

仲烈婦

烈婦姓牟氏。仁和諸生萬安女。年十五。歸仲氏。踰年。仲氏子卒。烈婦慟絕。自言無子。當從夫地下。其家大窘。守之。母氏泣撫曰。汝出閨時。汝父游學京師。今將歸矣。不能少緩一見父乎。始勉存視息。既父歸。就慰。且勉曰。慷慨從容。為節雖一致。然難易則有間矣。阿子信賢。當為其難者。且若翁早世。若夫又至此。太翁姑春秋高。若能節。不能兼取。孝行乎。烈婦反復竟日。始泣拜受命。自是素衣蔬食。為孝養計。益篤。以嚴。太

翁嘗患危疾。視者咸謂不起。烈婦涕泣。夜焚香告天。祈代。越日竟愈。往再十年。太翁姑皆逾七十。憐烈婦年猶盛。終無所依。密謀嫁之。有日矣。烈婦驟聞。哀慟達中。夕明日。姑往視。發扉闌然。閣中橫一几。跋燭燼。香猶在地。布氈爛。若祭告之設。急索之不獲。家背河。啟後戶。及岸。得其常服屨及箴筦諸物。始知烈婦自沈也。沿河尋訪數里。許無有。忽有人自上流來曰。某溪中一女子僵立。疾趨視之。則烈婦也。蓋烈婦既死。其屍逆溯。又刺入旁溪里許。止焉。溪上山。即烈婦夫所葬。其靈異如此。舉歸就斂。則衣衾齊及裳相屬。至襪履皆綴縫無隙。當事自大吏以上。聞之駭歎。設奠奉主祀。杭故忠節祠。水性上漫下激。入焉即仆。自非烈婦正氣之盛。烏能以弱質抗洪濤逆溯。所宜依歸而卓然若是哉。見李紱穆堂稿

張烈婦

烈婦姓劉氏。漢軍某旗人。鄉貢進士張子四維妻也。張子字若仲。浙江錢唐舊族。少失母。父某。以微貲賈於粵。挾若仲與俱。至潮州府。有中表某。在知府劉某幕中。來過訪。見若仲髻年端麗聰慧絕人。數稱於劉守。劉有數女。無子。因令入見。大愛之。以次女許字焉。即烈婦也。既若仲隨父歸。貨祿不售。盡喪其貲。若仲又以疾跛其一足。劉

守有弟官浙江見而恥之寓書其兄諷使負婚約劉守夫婦惑焉將別字他官子烈婦以死自誓父母勸譬百方莫能奪乃召若仲往就婚烈婦既失愛於其父母又其姊贅壻為顯人子同在署榮悴相形受侮益不堪烈婦勸若仲挈己歸若仲念家室濡忍不能決烈婦恚曰君少負雋才乃無丈夫氣邪遂辭以行奩具一無所取既歸無以為生烈婦工繡習繪事晨起作畫夜刺繡給薪水若仲感其意力學補弟子員康熙庚子歲余典浙江試得一卷絕整雅自破題至結語皆排對而讀者不知為排亟取之即若仲也明年計偕下第卒於京師柩歸烈婦號不絕聲未幾竟死以殉哀哉烈婦屈志艱苦佐夫未嘗隕穫至夫沒遂以死殉者謂絕意而無可復望於世也亦烏知世猶有為之文以傳其事重歎累歎而不能已邪彼其父母之鄙與所謂贅壻顯人子不過與草木同腐固不足復道即若仲或不死備名位烈婦與被顯榮偕老亦不過聊以愧世俗鄙薄而已烏能發志士之悲至於如是哉烈婦亦可以欣然於地下矣

見李敏穆堂稿

朱貞女

節孝朱貞女江西高安人家宰公毅之長女少司空李公鳳翥之家婦也李公子家



駟實聘貞女。未娶而夭。云貞女幼惡華綵服。加身輒驚啼。稍長。或以絳總其髮。捫得輒擲之地。酷嗜書。夜偕妹挑燈繹誦不輟。動止言笑必以禮。不失尺寸。王父母父母絕愛憐之。性至孝。膳飲必躬進。父母食必侍立。比徹乃去。暮必手整父母衾席。出立戶外。俟卧乃休。事諸母。咸得其歡。然當女黨宴笑時。聞貞女至。則寂肅斂容。諸弟或嬉戲相訾警。戒勿使知。或詔之曰。至矣。則皆走。然貞女和愉婉婉。不知何以見憚也。歲辛卯。李公登賢書。未幾。以疾卒。訃至。家人秘之。貞女涕泫泫下曰。何等訃也。不使吾知者。吾知之矣。飲泣不食者三日。家宰以常理摩曉。貞女哽咽曰。大人良愛兒。兒志決矣。不得已許之。以常服行。登舟。乃持服。李氏聞貞女至。舉家白衣冠號慟。出迎。貞女從容謁祖姑暨舅姑如儀。適喪次。一慟幾絕。廟見後。執婦禮甚備。家人往視之。則曰。歸語大人。兒無苦也。百年瞬息。未亡人待盡而已矣。祖姑熊太夫人疾。衣不解帶者三月。比卒。李公致書家宰。我羈京師。不能終事吾母。賴家婦盡孝。君女也。刻骨難忘矣。時士大夫爭傳貞女事。當道欲旌其室。貞女請於姑。達之李公。峻拒乃止。且書告家宰曰。兒事非中道。自行所志而已。脫以名加之。兒滋慙矣。已而不茹葷血。家宰曰。何自苦乃爾。對曰。偶喜耳。然以是終其身。家宰丁外艱。時以西陲用兵。奉詔。

奪情再疏請終制。賓友勸阻萬端。貞女流涕曰。大人不得歸。雖官在國。年上壽。猶無與耳。彼姑息之愛。非所以全我父也。聖主必鑒吾父之誠矣。累疏卒得歸。甲辰元日。鄰人不戒於火。勢甚烈。家敗倉皇遷避。貞女端坐室中曰。死吾分也。吾豈嚙雜覺。避火求生者。眾惶駭莫措。熊夫人破戶入。持之出。火遽息。是夏之季。冢宰聞仲弟訃。慟甚。嘔血不止。貞女歸省。私泣達旦。以是得寒疾。不肯醫藥。曰。吾女子也。吾手何可令醫人診視。死之前三日。謂兩弟曰。我一生未嘗有寸金尺帛加吾身者。死無負我。既卒。合厝於李公子之殯宮。時雍正二年也。年三十四。見蔡世遠希堂集。

孝婦李孺人

孝婦李孺人者。武定翰林院庶吉士丹書先生之正室也。系王氏。年十六。歸於李氏。君舅封公。先相國文襄公介弟也。繼姑劉太君。性格嚴峻。孺人嫻於禮法。奉其規條。靡有失墜。太君晚歲。嬰痼疾。輾轉牀褥。歲月滋深。動息有人。雖婢獲中。號為忠謹者。氣衰力殫。不能無怠。惟孺人躬自執勞。至竟日終宵。寢食俱忘。如是者七年。病之劇也。孺人祈禱誠懇。計無復之一夜。人靜後。孺人獨趨神堂。閉門久之。出而手自烹藥。以進。病良已。嘗孺人趨神堂時。一僕婦私躡其後。從窗櫺竊窺。見孺人向神前跪。袒

左臂彷彿似持刀割割狀。徐脫裏衣。燭影下鮮血淋漓滿袖。裏刃而懷之以出。孺人面不改色。動作如常。豪無悽楚之容。餘人莫知者。僕婦亦勿敢言。數年後乃稍稍為人述之。見蔡世遠二希堂集。

蒼菴編卷十六終

清 曲園居士纂

陳烈婦周氏

烈婦周氏。雍正七年正月。歸陳國材。九年三月二十日戌時。年二十六。殉夫死。去其夫之死五十日。夫既死。計為夫將來立嗣。盡二月。待其夫之姪男至。告以故。付以嫁時衣飾。曰。以是累君。其父隔江來白其志。訣別焉。其父勸無死。烈婦曰。陳氏無舅姑子女。將何依。隨父歸。人必曰。陳某妻謀再醮去矣。辱孰甚。議既定。明日。遂沐浴。紉綴其衣裳。極周緻。顧語人曰。殮時。幸無以寸絲。易吾衰麻也。吞金至五錢。不死。羸億久。餌大黃若干。莫暴下氣脫。反下所吞金。又不死。粒米勺水不入口。已十日。自勒。手死。不死。死。凡前後二十日。卒餓死。烈婦。上元醫士鑑侯女。國材。江都縣民。親餘用錫

陳烈婦李氏

烈婦李氏。父楚人。從軍家閩。既老。貧困。鬻女於洪塘林氏。林故宦宅。憐烈婦慧而少。養為己女。稍長。容色端好。眾莫不賢之。先是林有女。婚於陳。無子。歿。至是。林以烈婦歸焉。年二十矣。陳素患羸疾。與烈婦處五年。僅生一女。有姑嘗病。封股進。不能活。夫

病亦如之。家人莫知也。夫垂沒。語烈婦曰。吾病度不能生。所念者汝而已。將若何。烈婦泣曰。夫何言。亦惟有死而已。夫領之。及夫沒。棺殮醫藥諸費。負逋數十金。又有幼女在。度未可即死。乃日夜勤女工。取充餽粥。以其餘償諸貸家。又念老父無人養。乃迎父於家。父病沒。為喪葬。皆從十指辦之。不以累夫家也。幼女得痼疾。久之卒不愈。時已踰祥。烈婦欲殉之。或勸之曰。若夫未葬。堂中柩數世塵封。即若死骸。當何時歸土也。烈婦艱苦彌厲。久之。銖累黍積。得二十餘金。始辦身後事。遂以四月二十八日治棺。二十八日卜穴。五月三日卜葬。布告諸戚屬。會送者咸集。烈婦治酒食。如平時。夜既寂。乃沐浴更衣。謂其妯曰。妾死期近。特來相別。藐諸嗣孤。更以為託。邵姑應曰。諾。烈婦出堂。見家人皆熟寐。惟燈熒熒然。拈一香。對夫靈前叩首。徐曰。時可乎。步入房前小廳。家人覺有聲。起視。竟縊死矣。時年三十。康熙之三十三年五月三日子時也。周身衣袂。皆豫嚴辦。家人因舉而納諸棺。即日與其夫陳。及前婦林氏。合葬於西郊之洪塘山。郡中聞者。或拜於墓。或弔於家。無不嘆息泣下。

羅烈婦

烈婦姓李氏。歸於羅。死於羅。故稱羅烈婦。浙之龍游人。文學壁之女也。歸仁美。為繼

見林估樸  
學齋集

室性沈毅。遇事一以義自裁。順治二年。王師下江南。抵揚州。人情洶懼。仁美思奉母。盡室以行。虞不能兩全。徘徊未決。烈婦泣語夫曰。事迫矣。全母與子。君之責也。君當行。我當死。毋以我為慮。遂先戒所使婢。積薪樓下。屬瀕危。即舉火。未幾城破。烈婦登堂。拜別其姑。徧與家人訣。抱所生期歲女登樓。婢遂舉火。火發。婢亦登樓。眾感泣。從之者十人。烈焰赫赫。勢如天崩地塌。仁美知無可奈何。乃撫膺大呼。負母孥于以奔。時四月二十有四日也。與烈婦同難者。其姒劉氏。仁美側室梅氏。李氏。前室所生女宦姑。舉火。婢菊花。餘六人。身與名氏俱燼矣。烈婦焚宅。在新城廣儲門內。遺燼合葬西華門外。見王澹集

### 節婦陳氏

節婦陳氏。福建福清縣庠生峻生女。年十七。適本里林其默。逾年。其默病。氏日夜侍湯藥。不解衣交睫者數月。既而大漸。氏泣謂其默曰。君即有不諱。妾惟相從地下耳。其默曰。固知若能為此。願我上有祖父。暨兩尊人。且無後嗣。若其可竟死乎。氏號泣承命。其默卒。氏纔十九。強存活。莫以踐遺命。俄而夫翁逝。又值耿逆變亂。流離奔竄。與祖姑劉氏。姑陳氏相依為命。幸而獲全。家居攻苦食淡。而奉二老。則甘脆畢備。二十餘年不少怠。內外咸以孝稱。自其默沒後十年。諸弟未有子。氏日夕憂之。已

而長叔舉一子。因念嫂青年守志。繼嗣不宜久虛。請於尊人。願即以此子繼。兄後氏感泣拜謝。立為嗣。命名嵩基。焚香告夫靈曰。君今有子矣。拊育顧復。不啻所生。少長即延師授學。夜歸則篝燈一室。躬績紡佐讀。輒夜分始罷。嵩基年十六。即補弟子員。為邑名諸生。又為擇婚配。無何。長叔卒。無他子嗣。族黨咸以嵩基出繼於先。且節婦撫育恩甚摯。義不可背。次房當議別繼。氏曰。奚為迂迴若此。嵩基於長叔所生也。於未亡人。繼也。生者還所生。繼者復別繼。不兩得乎。眾皆感動。即日命嵩基為所生父。成服別擇某叔子立焉。恩勤一視。嵩基而於嵩基。仍厚遇之。不哀。氏幽閒淑慎。自為林氏婦。聲不出戶外。六十年如一日。以雍正六年卒。年七十有七。見甘汝來甘莊恪公集

### 宋景衛

貞女宋氏。名景衛。長洲人。性敏慧。讀書工詩。言語舉止。動中禮則。十歲喪母。父以家政委之。井井有條理。許字程玉生樹。樹母宋。與貞女姑姪行。見貞女才且淑。遂為樹委禽焉。樹年十二。通十三經。應試使院。日亭午。三藝俱就。講說易文。言及觀漸卦義。覆誦周禮左傳爾雅。如瀾翻學。使者竒之。遂擢前茅。未及婚。遭其大父比部君喪。痛哭。遭疾殞。貞女聞變。即不食。誓以死殉。諸父昆弟咸勸止之。父曰。與其輕生。毋寧守貞。



議擇日送歸程氏持喪以終其志踰年未及舉行會其父復有事越東貞女乃上書於父其畧曰自去春驟聞慘變遽欲以身殉之自明從一而終之義緣大人諄切曉諭苟延殘喘偷生視息實非衛之初志也許便料理過門不即入於九原猶得侍姑嫜於一日豈料一載於茲事多周折進退維谷衛之立心行事非若尋常女子遷延歲月可以改絃易轍者今亦豈欲遽離膝下哉奈昊天不弔降此荼毒抑鬱自傷久而成病愁多食少日甚一日恐非藥石能療終歸泉壤當此之時前後失據齋志以沒未能立一事未能成一行同一死也豈不惜哉豈不痛哉父愛重貞女過於諸子其遲之又久者實以他事間阻非過違女志也既還自越遂送貞女歸程氏時姑亦前歿初姑病亟貞女以不獲侍湯藥刺指血書疏籲天請減算以代人尤重其孝而姑竟不起貞女既歸於陳益讀書以禮自固間遇節烈事作為歌詩有西河陳烈婦詩六十四韻穿穴經義發抒己志讀者既歎其志節之堅并驚其學術之茂也論曰女子未嫁而以節著義何昉乎昉之柏舟也柏舟之詩曰鬢彼兩鬢實維我儀郝仲輿釋之曰兩鬢卅也齊風甫田總角卅兮是也顧麟士申其說曰鬢童子之飾也內則未冠拂鬢禮男子冠而後娶共伯兩鬢故知共姜未嫁也未嫁之女能以節著固不悖於經

義而為聖人之所許矣。後儒不察，輒謂非禮之正。豈不因哉？見楊繩武古柏軒集。

曲園居士曰：儀禮既夕禮云：既殯，主人脫髦。注云：兒生三月，剪髮為髻，男角女羈。否則男左女右，長大猶為之飾。存之謂之髦，所以順父母幼小之心。又喪大紀云：小斂，主人脫髦。注云：士既殯而脫髦。此云小斂，蓋諸侯禮也。然則親在之時，子雖既冠，猶未脫髦。玉藻云：親沒不髦，可知親在必髦也。此據髦彼兩髦之句，為共伯未冠之證。似於經義猶疏。然共伯之死，自是千古疑義。以睿聖武公之賢，而有弑兄自立之事，一可疑也。共伯既立為君，而詩序猶稱之為衛世子，二可疑也。共伯自殺在其父釐侯既葬之後，則久已脫髦矣。而詩有猶髦彼兩髦之言，三可疑也。武公九十五，猶能箴誡，則其薨也年近百齡矣。在位五十五年，則其即位也必四十以外。而共伯又為其兄齒必長矣。共姜年齒亦當相若。何父母猶欲奪而嫁之，四可疑也。史記此事未可盡信，索隱固已非之。然則以為未婚而死，或亦一說與。

### 蔡蕙

蔡孝女蕙，秦州人。父孕琦，母王氏。女兄弟五人，而蕙為之長。生有至性，不妄言笑。知服勞奉侍，承父母歡。既長，許字監生繆許。未出閣，會孕琦被吏議，當棄市。蕙即絕嗜。

味屏服飾玩好。夜不解衣而寢。晨夕必焚香籲天。為父請命。如是者四年不改。嚴寒大雪中。風四入。烏鳥。蕙不設。鑪火。寢苦枕塊。自如。許度孕琦不可活。欲完婚媾。迎蕙歸。蕙揮涕謝媒氏曰。父亡與亡。曷忍言其他。己巳春。上復幸江南。蕙草狀。甫畝訟冤。上曰。是女子也。而為父乞命。嗟嘆久之。有司希上意。以為緹縈復生也。孕琦由此得平反。蕙歸許。未一年病卒。見張符驥依歸草

### 王烈婦

烈婦湯氏。適太倉王既。遙子均。湯居海濱。為富民。均入贅。薄其貧。不禮焉。婦即與均辭去。均授徒。婦勤女紅。以自給。節脩脯。奉舅姑。雍正壬子七月。大風海溢。均夫婦被漂。婦得登岸。均死於水。湯氏翁媪幸均死。得更擇佳壻。不復求均屍。婦泣命其僮阿午曰。汝為吾求。不得屍。吾有死耳。午遍歷港汊。三日夜。從數百積屍中得之。馳報。婦被髮徒跣。赴哭幾絕。既棺殮。湯氏欲火之。婦不可。均有所置田十二畝。湯讓其十。餘二畝。婦埋均棺田畔。誓守志。時以粟麥錢布。陰餽舅姑。次年遺腹生一女。於是湯氏日夜謀嫁之。十一月二十四日丙夜。給婦內戚某家相迎。婦覺之。則麻衣要經。抱其嬰繞場而號。遠近驚起聚觀。無不歎息酸鼻。湯竟劫婦納輿中行。婦急以布自纏。周上

下無隙。至嘉定某家。哭不止。數人迭守之一夕。伺守者懈。遂自縊。湯氏逼婦行時。奪其嬰。將碎諸石。阿午從旁篡得之。夜奔入城。以歸。既還。貧不能乳。謀於其戚。顧行人王停。行人令其妻育之。名之曰潮音。四歲痘殤。阿午者。均家僮也。均死。仍傭於湯。烈婦之死。獨午知之。湯切厲勿泄。既還。老曠。亦謂婦死於疫。午心實憤。湯氏所為。念均夫婦。僅留一孤女在。時入城。至行人所省視潮音。則抱而之。既還家。或嬉他所。而後去。潮音之殤也。阿午夜心動。不能寐。若有促之入城者。清晨及門。則潮音已死。午痛哭極哀。曰。吾主人夫婦孝烈。乃天絕之若此邪。行人訝而詰之。午頓足嗚咽。具言婦死狀。且曰。烈婦棺尚在嘉定某家墓旁。午屢欲盜與主人合葬。昇者憚。不敢行。行人曰。盜不可也。其鳴之官而歸之王乎。湯氏聞之。即密令某家火婦棺。以滅跡。午詭稱湯使往視。斂其骨。以空罌易之。奔告行人。行人令以其骨。與潮音同瘞於均墓。噫。湯固市僧。既薄貧壻。又因壻而致殺其女。何不仁甚哉。然以湯之翁媪而有是女。異矣。非午則均屍不復得。非午則潮音亦不全。非午則烈婦之死。遂無知者。烈婦之骨。亦不得與均同穴矣。其篡嬰兒勇也。詭收婦骨智也。謂之義士可矣。

魏沈起元  
敬亭集

孝婦姓朱氏。名如玉。字又寒。仁和朱久亭女也。嫁同邑魯君。旋長子縣學生宗鎬。宗鎬家故貧。孝婦黽斂事舅姑。得甘旨。必先以進。解己衣衣其姑。斥己裝以資遣其夫之妹。嫁時物蕩盡。人為之不堪。孝婦無纖毫苦難意。感黨某挾訟來求貸。宗鎬謝不能。則恚甚。孝婦曰。若情急耳。勿與校。檢衣襦質白金四笏畀之。其人欣然去。或以重賄求宗鎬為關說。勢家孝婦勸勿受。宗鎬曰。我度是無關利害耳。孝婦曰。世上不義事。皆從無關利害處做起。奈何以貧故。墮素行。宗鎬感悟。謝不與聞。其舅聞之。謂宗鎬曰。兒婦真若嚴師矣。戊申六月。宗鎬感疾。幾殆。閱兩月始愈。婦晝夜侍湯藥。遂以勞悴致疾。是年十有二月丙申歿。得年三十一。女生九歲。名學班。孝婦體弱。素多病。願強自撐拄。不以貽舅姑憂。己不食。猶力疾執爨。其舅課生徒。讀書過午夜。孝婦亦坐候具茶餌。不就寢。其歿也。舅之及門士。為痛哭失聲。中表兄子姚虞士。喪之若親叔母。其賢能感人如是。姑有胃疾。間數月輒發。孝婦身不去牀第。酷暑汗下如雨。不敢揮扇。以袂拭面。衣裾濡浹。日夜為姑撫摩。稍間。為誦彈詞稗史。以解姑痛。比孝婦歿。姑疾作痛苦。輒長號曰。吾媳若在此。時不離牀右救我矣。善詩。工屬對。能為設色花鳥。死之日。預知時刻。見汪由敦松泉文集。

曹借姑

孝節婦姓曹氏。小字借姑。一士之從姑母也。父天策公。為擇對里中。得陸君韜。未成童。入府庠。有能文名。遂以字之。年十六。歸陸氏。陸氏姑孀居。有節操。婦事之惟謹。中外稱其賢。未幾。夫病瘵。累年卒。孝節婦年纔二十三耳。舉子女各一。子不育。至是乃立嗣子。嗣子則又不育。族人無肯以其子嗣者。有陸尼者。微諷曰。少寡。肩絕。姑老女弱。將奈何。孝節婦恚甚。立槌胸。嘔血。尼驚走出。自是終身不復見其面。康熙八年。姑疾。日侍榻前。不去。已而疾大漸。乃中夜焚香祝天。引剪刀。剪左臂肉。無血。創甚。不敢出聲。還入房。為羹以進。姑不食者數日矣。曰。此何物。乃有異香。飲之。至盡。遂愈。并不使小女子知之。後乃曰。世傳為此者。遲聞。一日。則病者多活一年耳。紡木棉以養。閱十五年。姑乃卒。女字邑右族張氏。贅而依焉。壻家亦貧。族兄弟共迎養之。卒年七十四。距喪所天時。計五十有一年。三黨咸尊之。稱曰節孝婦云。節孝婦年三十三時。母楊老疾。醫者云不治。孝節婦復中夜焚香祝天。引剪刀。剪臂肉。血溢手腕。創甚。不敢出聲。還入房。雜米湯中以進。母哺米至盡。餘一粒。大如豆。曰。此何物。又汝肉耶。哽咽淚下。簌簌然。推去不竟食。遂卒。初節孝婦往來一士家。士年高幼。輒牽衣問姑前後所割臂。

癡處欲一覩。慨然不悅曰。郎君輩何自知之。此自愚婦計無復之。姑出此耳。郎君輩安用見之。見曹一士四馬齋集

姜桂

貞女姜氏。桂名。芳垂字。孝廉本渭之季女也。世居萊陽。今籍元和。年十歲。字於張。未行。而張以瘵疾卒。女年十九矣。訃聞。泣三日。遂自經。昏迷中。若聞有呼者曰。爾當享大名。何為是。乃甦。而縊已解。時父以應試在京。女即告其母曰。女子從一。改適不可。可改字乎。為白父。勿萌他念也。父以書援禮經曲折諭之。女曰。父言誠是。但女賦性如此。不可變。富貴福澤。非所好也。拂其性而為之。無生理矣。居三年。戚屬爭言。不宜聽女守。父母亦意其志少衰。復垂涕為言。女曰。女不悲。母何悲也。人生適性為樂。遂矢志。則樂甚。何悲之有。夫言有可忘。有不可忘。既許字矣。雖終身。其可忘哉。父知其不可奪。強齋沐而禱於神。神示吉兆。遂聽之。貞女乃畫蘭。漸乃繪山水。父假諸名迹。示之。晝日進。駸駸逼雲林黃鶴矣。而端靜之意。亦流露豪素間。用志不紛。乃凝於神。其尤可貴重也。夫觀陶正靖晚先生集

烈婦馬氏

烈婦馬氏。故福常把總馬成功女。適福山章揆蒼。生子輒殤。揆蒼病且殆。屬以奉舅姑。涕泣受命。揆蒼歿。久未克葬。殯於某所。舅學洲貧老且病。瘋或為之謀。謂婦艾而族姓少。即嫁之。聘錢可獨有也。營將某致重幣。及富人嚴某。先後來逆。皆死拒得免。學洲固深惡之矣。章有族孫曰小五。土豪盧某之甥也。說盧謂能致之。與馬相卿者定謀。使其姑。始以俱往。省某親婦。覩姑升輿。不疑。遂舁以如盧氏。及門。覺有變。顧不得脫。乃散髮踞地坐。哭且詈。盧大驚愕。俾嫗為好言。許送歸。婢女日夜謹伺之。誘譬萬端。大陳金綺為餌。氏厲聲曰。吾翁與若為姻家。胡無良至此。吾所以求歸者。為夫骨未埋。且遺言不可負耳。若必欲見迫。即此為吾死所矣。馬用金綺為悉擲之庭。盧度終不可犯。顧重惜聘財。又恐一旦致死而破家也。踰三月。始送歸。而小五等以償錢脅學洲。復為學洲謀。築室于田。使獨居以守。竇盧之別業也。居數日。盧盛服至。婦憤觸柱。抵几。折一齒。盧益懼。乃陽白縣聽歸。而使學洲戒門絕之。烈婦呼搶哀求。方歲冬。屏營戶外。風雪僵凍。卒不納。寄居舍旁。尼庵。又不許。亦小五等謀。冀其困而改圖也。婦有妹在楊氏。將為訟。盧又恐。授意學洲。迎還。畜以奴隸。食以犬豕之食。烈婦安之。無怨言。尋復逐之。守備陳某。見而問狀。俾其族之隸。度下者。諭以大義。學洲不



得已納之。未踰月。又怒而擯之門外。烈婦乃拊膺曰。非一死無以明我心。或勸為尼。烈婦曰。身體髮膚。不敢毀傷。吾向以憤怒折齒。至今悔之。且吾違翁命。不孝。從翁命。不節。不孝不節。苟活何為。孰與全而歸之。見故夫地下。即走其夫殞所。哀號徹日夜。遠潮上時。拍手連呼曰。盧賊殺我。盧賊殺我。跳波中死焉。時雍正六年十月二日也。年四十有二。屍隨潮上下。後十日。獲之蕭家橋。邑侯親殮。觀其裏衣。皆密縫紉。佩一小囊。貯所折齒。侯歷詢鄉老。具言其節烈不污。萬口無異詞。嘉歎良久。捕諸凶。鞠治而章小五者。竟匿不出。觀陶正靖晚先生集

### 茅貞女

茅貞女。通之泰興人。年十六。許適張氏子。張貧窶。棄家為僧。致詞於貞女之母。母許之。貞女素嚴重。不遽以白。越二載。復字他氏。歸有期矣。乃遣乳媪白貞女。貞女聞之。泣。徐謂媪曰。吾女子。安敢逆母意。然聞張氏姑老且病。窮餓不能自存。吾心怛怛然。今欲有遺於張。非汝莫可使者。汝為吾密致之。吾無恨矣。媪許諾出。貞女即閉戶自經死。方媪之諾而歸也。金藏諸笥。為不肖子祛去。甚皇遽。徐聞貞女死。即隱不發。忽數日。媪狂叫自責曰。汝尚為有人心乎。盜吾金而負吾約乎。數自批其頰曰。若子所

盜金。今具在。吾為汝往取。立起如指所。金果在。持詣張氏姑。長跽泣曰。吾不得事姑。罪通於天矣。今以此為姑壽。遂奉金進。伏地號哭。不能起。張大駭愕。無何。媪歿。具以白。乃悉其故。異哉。事在康熙初年。見項之卷。船齋集。

廖氏

廖氏者。蜀江津縣民戚成勳婦也。成勳僻居山中。值獻賊變。倉卒奔竄。廖弱不能從。不得已置之去。廖堅閉重門。自誓以死。逾數月。賊不至。倉中積穀頗饒。資以食。數年。荆棘叢生。蔽其宅。遂與外隔。其後食漸不繼。向宅池邊種穀。續之以草。為衣。四十餘年。亦不知成勳之存亡生死矣。成勳竄入黔中。久之。別娶某。生于二人。年六十餘。歸訪舊里。是時天下甫定。川中土滿人稀。田園半沒深箐。虎豹豺狼。出沒縱橫。人跡罕到。無從覓其故居。但識其向而已。因倩人力持斧斤。斬竹伐木。數日。望其宅。顏歌尚存。大樹如圍。自屋中出。微烟出沒。異之。固不知其妻之猶存也。及近宅。廖忽從樓上呼曰。汝輩何人。成勳惶怖失色。倉卒厲聲答曰。吾此宅主人戚成勳也。廖窺視良久。覺衣冠迥異昔時。而聲音容貌彷彿似其夫。泣語曰。君妾夫邪。妾廖氏也。可將君身。餘衣褲與妾得。蔽體相見。成勳怪之。然聽其言。似非無意者。即解衣擲樓上。須臾。

氏自樓下。面目黧黑。髮亂如蓬。成歎恍惚莫辨。廖備述其由。兼言當日事。歷歷夫婦相泣如再世。偕至鄰家。復自黔挈其妻子還。年各九十餘始卒。見彭端淑白鶴堂集。

馬孺人

孺人馬氏。河南邙縣人。繼室於同邑古村之劉翁。生一子而寡。崇禎末。中原流寇起。孺人嘗指後園井語家人。脫有不虞。當索吾於是。比寇氛益急。里戚婦女皆出避。要孺人與偕。默弗應。固要之。則曰。吾計之熟矣。吾閉門不出。猶冀匿籬壁以免。出而遇賊。身之不免。且重辱。凡所為婦女遠丈夫也。而吾又釐也。蓬首垢面。雜稠人中。匿草間求活。雖幸免。為辱已甚。吾弗為也。乃令奴機警者伺門。而身恆不出堂帷。無何。盜至。見堂宇頗壯。即縛門者。施拷治。索財物。且訶問主者為誰。門者惶遽曰。主翁死。郎君適遠出。家惟主母在耳。孺人立堂後。微聞其語。曰。嗟乎。誠不免矣。趨自沈於井。覘

殷烈婦

殷烈婦胡氏。殷士膚之仲婦也。士膚長婦汪氏。以節稱鄉里。而仲婦胡氏。乃復以烈聞。汪氏之寡也。姑亡矣。而舅衰叔幼。家貧甚。其母氏欲奪之使來。汪引刀激謝使者。

歲時泣拜其夫衣冠於堂上。督家政。及胡氏夫亡。有遺腹。汪以義諭之。不死。且得男。未及百日。而孤又亡。汪氏曰。嗟乎吾孀。乃今死矣。強慰之曰。孀與吾俱寡。願忍令汝姆獨活邪。烈婦曰。姆獨活。持殷家門戶良難。吾且為姆報伯氏於泉下。於是家人衛之。徹夜。婦益故攝事。衛稍懈。而戶忽扃。乃驚相告。爭曰。毀門。門毀。婦固從榻後立。眾笑曰。娘子何驚人也。爭前持諦視。頂有組下垂。頸痕寸許。而一小刀血淋漓地上。嗟乎。蓋迫於救。投環不及。而急自刎也。時雍正十三年。年十九。閱一日。母家來視。猶植立。面色婉孌如生。汪氏哭曰。孀汝亦殷家婦。獨以死謝邪。見張尹石冠堂集

文鶯

李長祥。字研齋。四川夔州府達州人。崇禎癸未。選庶常。京師潰。乘間南奔。起兵浙東。結寨上虞之東山。大兵以全力壓之。遁至奉化。依平西伯王朝先。復合眾於夏蓋山。由健跳移翁洲。入朝。加兵部左侍郎。初侍郎之在寨中。也。寄帑上虞之趙氏。及寨潰。相傳侍郎已殪。其夫人黃氏。聚其家人謀共死。有僕婦曰文鶯。夫人婢也。曰。夫人當為公子計。以延李氏香火。惡可死。曰。然則奈何。曰。婢子死罪。願代夫人。以吾女代公子。而俟死於此。而夫人速以公子去。夫人泣曰。安忍使汝代吾死。曰。小不忍。最害事。

速驅之。而山中有羅吉甫者。至是奔至曰。夫人公子。我則任之。雖以是死。甘心焉。於是夫人抱其子。誦拜吉甫。且拜文鶯。文鶯曰。夫人休矣。捕者行至矣。甫出門。捕者至。以文鶯去。吉甫既匿。夫人知朝先之於侍郎。姻也。乃以夫人母子往。則侍郎已先在。馬相見痛哭。為言文鶯一木訥女子。今若此。而文鶯被逮。居然以命。婦自重。雖見大府。不肯稍屈。莫不以為真夫人也。時例應徙遼左。按察使劉公自宏者。淮人。一日五鼓。傳令啟城門。命吏以文鶯就道。不得少待。或曰。劉蓋憐侍郎之忠。亦壯文鶯。密取歸。養於家。而以囚中他婦代之云。而侍郎之自翁洲亡命也。又與夫人失。及居山陰。則夫人又自海上至。得再聚。侍郎既羈江寧。夫人已卒。總督馬公陽禮之。而終疑之。曰。是子然者。誰保之。侍郎微聞之。時江寧有閨秀。曰鍾山秀才者。善墨竹。容色絕世。乃娶之。朝夕甚昵焉。督私謂人曰。李公有所應矣。未幾。侍郎乘守者之怠。竟去。見全祖望結埼亭集

曲園居士曰。結埼亭集載明季遺臣事甚詳。以全集具在。故不備錄也。文鶯事。附見李公研齋行狀。摘錄其事。亦不贅者。識小之意耳。

### 章貞女

貞烈女章氏。錢唐馨如里人。六歲。同里蔡松。為其子九經相。倣。貞烈女年十九。九經

以不得志於有司。病且死。貞烈聞訃。引剪刀自刺。亟救則生。生則給其母。請弔於蔡。母則與偕往。及至蔡。哀慟行婦禮。遂辭母。登姑氏樓。勸之歸。則截髮以誓。已而闔門苦坐。寒暑不變。所卧榻。不張帷。立兩扉。晨昏持鑰自啟閉。其嚴整如此。姑疾篤。貞烈刲股以進。未幾。乃其翁相繼亡。貞烈執二喪。皆冠線倚杖。隱拜帷內如人子。不忍以無嗣。恫舅姑之心。斯所謂禮以義起。蓋其孝也。家甚貧。倚女紅自辦。晚乃賴諸姪。稍稍致饗殮。歲大稔。里中賢者奉粟米致堂下。必再拜。強而後可。諸有司貴人。命隸人齋錢帛到門。往往不受。其天性高潔又如此。生隆慶庚午。卒於順治丙申。穿蔡子之窆合葬焉。見孫治集

### 蔡孺人

孺人蔡氏。閩縣西仲林先生雲銘元配也。先生以順治戊戌成進士。授江南徽州府推官。明年海寇犯江南。偽謀四逼。至徽營兵叛。先生與刺史蘭矢登陴死守。慮為家累。屬孺人歸閩。孺人指劍誓曰。苟不測。從君伏此劍耳。惡乎累。越數月。偽謀擒。叛兵亦逃去。先生急治行。嘗額其署曰。焚香告天處。當夜焚拜。孺人從。先生曰。此吾職。汝何為者。孺人曰。吾亦有祝。願與君生入仙霞關。灌園為食。不願久作吏也。丁未。裁缺。

先生自徽奉封君居建寧。耿逆反。繫先生。籍家。三就戮。復獄。與子沅。皆殆。孺人灼香禱。左臂爛寸餘。弗恤也。王師入閩。先生始出獄。計在繫十有八月矣。孺人憂懼。久吐紫血多。且斃。女瑛佩。剜臂肉煎飲之。乃甦。瑛佩者。閩清諸生鄭邦室。初孺人年十六。歸先生。孕輒女。欲得男。為先生嗣。續計。時時勸納。媵自孺人年二十有五。至卒年四十有八。凡納媵七。孺人素孝謹。善容下。所納媵。必開誠撫遇。恩視姊妹。分與如妯均。先生或督過諸媵。孺人必多方解。至釋乃已。以故諸媵亦恭順。無間言。每當夕。皆惟孺人命。及媵生丈夫子。孺人保抱携持。同卧起。如己出。所親有婦異妬。而五十無子者。孺人延至家。使視已治家狀。三日請歸。為夫置妾。舉二子。於是諸所親婦。或忤其夫。共指孺人以勸。皆媿悔曰。勿使孺人知云。及遷武林。越壬戌冬。孺人卒。諸媵哭之哀。有嘔吐血濱死者。見鮮銘南窗草存

林烈婦

烈婦翁女也。年十九。歸林雲禧。雲禧以嗜學病危。烈籲天割股糜之以進。病遽愈。久之復作。死。烈哭絕。而甦。引魂帛經柩側。以婢救免。乃取雲禧絲絛繫腰際。婢告姑。姑屬烈。母伺甚密。烈謬謂姑曰。兒今不死矣。屬婢滌房帷。如素焚修。示無死意。月餘。

晚沐浴。早起盥櫛。給其母出後。櫛衣縞。密縫結。扃戶自經。先是雲禧與烈決。許以死。其翁曰。我兩老人方哭子。不能再哭婦也。姑與家人俱以翁意勸。烈曰。固也。吾曩者以死許之矣。且吾姊未婚而殉夫。吾婚兩載。猶偷生。不愧吾姊哉。竟死。有遺詩四章。烈姊名茂。宋所殉夫林耀祖。雲禧宗也。烈名永。宋與茂。宋皆明經翁輔女。翁林。皆福清大姓。世婚也。見薛鎔南窗草存

貞節林母

母三山陳公泗水女。年十八。以繼室歸培生林公。以嗜學病瘵卒。時母年十九。甫舉孤九閱月。號慟幾絕。而甦曰。是誠不可以死。乃畢喪。携孤及前母所舉幼孤。與女各一。依泗水公。撫教備諸艱。縫刺以給事。泗水公尤謹。泗水公卒。年七十。遺一孤。甫六月。以屬母。母撫教如孤。長為置婦。視如婦。前母孤某。先母卒。婦某舉一女。或諷婦。女固有姑。在婦何自苦。婦泣言為死者育女。以事姑。亦欲學姑耳。舍姑與女。奚之。竟不奪。而泗水公所屬六月孤某。與婦某朝夕養甚恭。曰。吾姊乎哉。吾母也。卒年六十有

三。見薛鎔南窗草存

龔烈婦



烈婦謝氏。揚之興化人。夫龔行。縣頻年被水。室廬蕩沒。貧無依。隨其夫。攜女客京口。南城外河干。腐豆為生。時京口設重鎮。分屯戍卒。雜民居處。無賴子竄入為曹。每憑藉聲威。吞蝨細民。江寧人田五者。勾屯卒。朋放息錢。肆舍與行居相望。窺謝及女姿。屢賜之。嚴拒。匿其女不出。一日。行晨以外事。田即挾羣少過謝。伴酒後索茶。乘醉遂犯謝。謝倉皇號呼。田怒。即仆謝地。掌毆之。女出救。隨犯女。女急走脫。猶憤憤欲入內。值鄰眾集。擁多人。始揚揚去。謀之黨何三。何三者。狡黠為黨渠魁。乃教田作偽券。即羣過索負。因痛毆行。鄰並實知之。素怵田。莫敢為行直者。行不能伸。乃奔訴之官。官漫弗省。反答行。勒償田負。且逮謝庭訊。行歸語謝。謝與女仰天呼曰。冤哉。天乎。此誰控乎。已隸復擁行去。暮謝猶篝燈候行。夜深不返。乃持女手泣曰。以吾故。陷汝父黑冤中。即吾死不足恤。獨憐汝耳。女亦泣曰。母死。女何能獨生。即生亦蒙不潔名。願相從。得仍為母子。謝曰。悲哉。恨汝父不即歸。痛無一言與相訣耳。言訖。復相持哭。哀號之聲。慘動鄰室。比舍莫不聞者。迨鷄三唱時。遂不復聞聲。乃以敝赤帶繫身。及女臂。開門。連袂投河。津死。及曙。鄰媪往視。室無人。因共奔告行。隸猶謂行匿妻弗出也。及行至河濱。屍雙湧。從水中出。時盛夏。踰五日。殮面如生。莫不驚以為神。謝時年三十四。

女十七名巧。或曰烈婦時已有身。蓋殞三命云。前二年有趙氏婦亦死於烈。邑紳士里民感其節。千餘人為文肅祭。鼓樂白衣冠奉柩送葬釜鼎山下。道經謝戶外。謝聞之。特與女出視。呼嗟歎羨。重以為榮。曰。人生如是足矣。及凶既伏辜。奉命坊表。邑紳士里民為文肅祭。鼓樂白衣冠。一如前趙時。舉二柩復送至釜鼎山下。與趙墓並叙列葬。表其坊墓前而歸。

見冷士喘江冷閣文集

### 冷節婦

節婦夏姓。父處士君。有文學。立身方嚴。不苟尺寸。節婦年十六。歸冷君二與。二與少浮放。日酒於酒。節婦屢規之。不從。卒以此積病不起。歿時年二十七。二與未死之前二年。即已病。節婦私念。既諫莫入。而又身未嘗娠。脫有不諱。冷氏將何承。乃日夜促其夫置側室。夫不可。節婦曰。君縱不自為計。如先世何。乃強為之。未幾孕。是時二與病已劇。節婦每私祝曰。使生男。冷氏其有祔矣。已而免身。果男。節婦喜不勝。甫十月而二與歿。時節婦年二十六云。私謂庶曰。我矢志保此兒。存冷氏。汝將安從。庶泣對曰。母尚爾。敢有他耶。因共相要以一節。然冷氏自二與時。家已落。節婦與庶日夕惟仰給於其指。姑性尤戾而苛。不以子婦禮禮節婦。詬誶聲時相聞也。兼復有他侮。橫

逆之來無日無之。狼狽顛倒。非復人理。節婦與庶特志意諧協。無少怨言。每風雨夕。一室中影相弔也。燈前少倦。即抱兒置膝上。與庶較紙。相對欵欵。初二與歿時。有勸節婦謀他計者。節婦輒志責曰。吾誓為冷氏保此兒。人有志。何相黷也。父處士君素知之。乃取枇杷一枝插階下。識歲月於壁曰。此木晚翠。使汝志果堅。後當實。否則萎耳。後枇杷長。日益茂。不數年。蒼翠蔚然。結實盈柯。條纍纍。凡數十百顆。遠近聞者。莫不相諮嗟太息曰。此節婦徵也。節婦歿時。年六十有五。而十月子巳年四十矣。庶陳氏長節婦二歲。子名利德。見冷士壩江冷閣文集。

### 桐鄉諸節婦

室女守制兩人。戴禹功妻陳氏。莊大成妻蘇氏。未婚守制兩人。朱辰宿妻楊氏。朱廉妻茅氏。夫瞽。誓嫁一人。陸廷璋妻倪氏。夫亦貧。誓嫁一人。張冲和妻周氏。陳之值戴歿也。聞訃。謂父母曰。不容往送。當自經也。至則抱屍大慟。剪夫髮及夫爪甲為佩。告舅姑曰。此吾夫也。已遂對屍成夫婦禮。挾老婢與俱。坐卧一小樓。四十年如一日。蘇氏則甫十四耳。聞夫歿。毀形衰服。矢志弗易。翁姑感其義。迎歸守制。拜廟受笄。修婦道終身。楊之歸朱也。未婚而夫病劇。翁利其有。給之來。來三月而不成。婦夫卒。遽拜

棺成禮。翁姑尋亦卒。力營三墳。皆就緒。茅歸朱以夫病。亦不成婦。侍夫湯藥。祝以身代。卒不起。其翁姑迫之他適。勿聽。詬厲之。飢凍之。亦勿聽。為是悛而止。陸之聘倪也。閏三月。旋醫陸請辭婚。氏言曰。古有男室瞽女。况吾夫乎。卒歸陸。周氏生四歲。許張氏子。父母死。育於外大父。張酷貧。更許他姓。及長。議婚。奔歸。抱父木主而啼曰。吾父在。聞字張。張即赤貧。奈何廢死父之命。扶利刃。訴之官。官為動容。得配合焉。又有徐沐妻祈氏。陳敏才妻施氏。朱一豹妻張氏。費可學妻張氏。倪大緯妻恣氏。皆弱齡于歸。皆有子。皆砥礪節。而皆玉子於歲。諸婦俱桐鄉人。外史氏周拱宸。葺之郡志。復為之贊。見周拱宸集